


解學士集


九



內閣文庫			
四 函	一 冊	三六二九 號	漢書類

內閣文庫			
三六 函	一 冊	三六二九 號	漢書類

內閣文庫			
番號	漢	3629	
冊數	10 ( 9 )		
函號	316	102	



解學士文集九卷目錄

墓誌銘

吳處士伯岡

江孔殷

周夫人宋氏

故西山劉先生

周吾文

故元邵武路同知蕭公

大明吏部尚書陳公

周宗振

孺人胡氏

故監察御史陳公仲述

淺草文庫

吳先生

夏侯時雨

仲巽陳君

莘雲先生

高夫人

處士周君子深

故元閩海道廉訪使孫公

處士劉公文明

倪夫人鄒氏

周君子仁



蕭益清

夏孺人鄒氏

戶部尚書郁公

黃君仲簡

劉君允中

彭生叙古

周趙哲君

竒峯高君

處士張國賓

侍御史滄江解公故夫人

國子祭酒徐公

翰林藍君日省

黃守一

高汝楫

胡時未

劉處士維岳

李祥雲

高御史

劉處士從龍

高賓暘

北溟周君

劉君象賢

徐學皋

古田井胡公

曾孺人

清河丞徐君

仲巽陳君

倪處士

劉君惠遠

周君子用

咩樂徐君

劉明道碑

尚書郁公神道碑銘

知思明府黃公碑

福田明覺寺佛道場碑

解學士文集九卷

墓志銘

吳處士伯岡

甲子

新安齊國文公闕里也遺風餘韻奕世猶存自宋亡元興時則有若程勿齋吳義夫汪古逸趙子常鄭彥昭汪德輔倪士毅朱引升鄭師山唐三峯傳至國初以性命義理之學講淑諸人皆不失爲文公之徒也余嘗聞而爲之羨慕之今戶科給事中兼司經局校書吳君彥守新安之世家也同官多暇因考論其師友淵源而君爲余滋以泣奉唐君子儀所爲其父吳處士伯岡行狀求銘勒於其墓按狀伯岡從學於子常彥昭而講於德輔以下諸君子儀三峯之子也文公之澤豈不長哉若吳氏系出漢長沙王芮

四男分居新安休寧歙縣其後有諱少徵者仕唐爲監察御史曾孫瑤自休寧徙居歙之富饒瑤生叔臻臻生明明生超興元甲子遷居海寧超生春春生天推推生琇爲令休寧因勸農歷諸鄉愛金竹山之勝復徙家焉第四子曰依舒通守閩州曰者分居吳田依舒生子志志生泉湧湧生士雋雋生積積生道傳傳生琬琬生逢辰辰生梓榮宋迪功郎吉州泰和縣主簿梓榮生彥松松生邦呂歷官成忠郎致仕年九十餘方卒生柔遇遇生賁龍元承道郎大平路繁昌縣尹號屏山先生生之泰泰生淵字萬頃號白雲先生是爲伯岡之父其配某氏伯岡之母也伯岡諱王林甫六歲日計數千百言皆通大義成童有詩名習舉子業儕輩推服試有司不利未嘗恨父子師友之間講明學

問甚自樂也天兵下歙辟爲叅軍未幾棄去竟以隱終方元季兵興時伯岡總其家政內外整肅事親極孝養尤克友其弟祖瑤 橫一身當之而弟與親不知也妻之元鳳諸孫盜乘亂欲劫其家其家逃匿盜縱跡之欲加害伯岡盡出其私財與盜以免之其里人有疾衆謂不可良醫竟活之其收養孤遺賑恤窮乏如將不及里中土宜稼而常以旱爲憂出其私財鑿山引水爲渠既成而旱不爲之災民咸利之建義庄積粟以備祀先上塚聚族人宴會終給之里人咸服其義有爭競求直者或歸就其質正嗚呼仲尼有云施於有政是亦爲政非伯岡之謂歟伯岡平生所寓意多見於詩有松羅陰稿二十卷藏于家生於元延祐丙辰五月十有七日歿於洪武庚戌十有一月四日享年

五十五後十五年塋于 之原配程氏宜於家族後二  
年卒年八十一子男二人長樵早世次即彥守初爲縣學  
生以勞積擢紀善至今官階從事佐郎女一人適江仕翔  
係男果善功遠孫女適江彥華銘曰 顯德吳君篤實之  
學良貴既榮豈慕人爵拂衣轉門白駒空谷義倡于鄉仁  
恒其族鄙夫吝財剖身藏珠矧曰衆早私資築渠矧曰冠  
至求金求璧我竭我藏庇其親戚其生也榮其歿敏寧其  
後宜昌不爽于名

吳先生 己巳

洪武丙辰先君子之友胡延平卒于官仲勤吳先生延平  
之妻兄也來經宮塋事予從先君子識之胡延平之家見  
其英邁不群甚敬服之先君子曰小子未見孟勤先生世

猶吳氏二鳳是其兄弟予請問其詳則曰先莘樂先生吳  
而祖同時佐義兵而祖不幸殞于兵莘樂亦賫志以沒其  
時孟勤兄弟年皆弱冠負文武才數以策于城守者皆不  
能用後皆如其言其父子豪傑之士也又曰元盛時江右  
詩人自范文正公揭文安公而下流而委靡獨擅音節而  
不失其雄渾者莘樂父子其尤也去之十餘年爲洪武丁  
卯始及拜先生于家得聞餘論懽其平生明年先生復之  
楚又後十餘年得先生于史館痛先君子之不復作每授  
教咸爲之興感先生亦念其故人之子愈加愛厚未幾而  
先生蒙 恩得散地以佚其勞遂以捐館聞予追平昔集  
次先生寄予書大篇短章詞藻溢目老成忠厚之情及引  
教之意不覺其感愴之至也欲爲先生述傳而先生之子

善存以庶子胡君光大所為行狀一通求為之銘胡君延平之子先生之甥也知先生之家世群行為尤詳謹按狀為銘先生諱勤字勤其先大梁吳氏徙居于荆至諱某者宦南康子孫居廬山之陽宋淳化間有曰某者為求新簿因家焉曾祖原道妣某氏祖文振妣李氏父師尹字莘樂學者稱為桂山先生終求豐丞公幼敏悟初學語時能識錢上字人皆異之十七八為文章詞藻天發歲癸卯

大祖皇帝兵下吉安叅謀郭子章有詩一名見談論歡如平生即署公泰和令以親辭洪武初徵天下名儒試中書堂第一人

大祖欲作興儒學特除武昌教授學儒其化大行復以例免歸楚王致書幣迎為世子郡王師蜀王及湘獻王交致書

問深相敬慕永樂元年與脩

大祖實錄特除開封儒學教授周王待以賓禮世子獨愛重之永樂三年二月戊辰日卒于官公生先至順庚午八月享年七十有六明年月善存以其喪屬塋于鄉某山之原孺人蕭氏善治內事先十年卒子一人善存也一女

適胡立先生既居安福善存今為安福人孫男曾孫

男公孝該博手未嘗釋卷老而不倦為文章詩歌敏而甚工尤善行楷書在史館時七十餘矣運筆如飛館中能書者數百人噴口稱歎天性孝友事繼母尤謹待姊盡其敬撫猶子極其慈接物平恕而賢否甚明善飲酒遇賓客而故人傾倒達旦軒輊議論襟懷洞如也當念其先舍南康故曰匡山樵者居武昌曰黃鶴山樵晚更號由翁皆

以名其文集并六藝集若干卷銘曰 豪傑之才該博之  
李剛大之氣壯而不遇時老而不大施其所自著足以傳  
世煜然其光不可秘

江孔殷

嗚呼孔殷舍我而遽死耶今欲為汝墓銘執筆嗚咽欲于  
復止者數矣不知其泣涕橫流而與筆之俱墮也嗚呼何  
其哀之至耶嗚呼予嘗恃汝以為身後之託而反執筆以  
銘尔墓耶又嘗恍然而白語曰豈夢寐耶而今汝真死矣  
幾將一年青燈逆旋叙平生之事而為之銘時孔殷年十  
餘歲時避仇鄉之夏璜予讀書東溪彭氏負之過廬原嶺  
始教之李其時已穎敏過人為編次杜詩作字端謹動止  
循良子方李文字業每坐達旦輒從傍注視稍能通大意

予甚奇愛之後數年予舉進士得官侍親還家始務為古  
文辭又嘗坐達旦獨孔殷與俱雖動靜言笑無不視予所  
為者予又勉之曰求之古人我 學其所為書札經義  
皆與予亂真予久自不能辨也其家世名儒南唐末知吉  
水縣因家焉然貲富甲一鄉觀其意則一毫不以動心而  
專力於學其勤又甚似予也去鄉而學遂成聞其舉進士  
京師會試中居前列入對

大廷 聖天子遣中使視之錄其文以進文武群臣合口一  
辭皆謂其當第一既拆名乃第五勿論殊以為屈而孔殷  
歎然稱已過分會有 詔賜還鄉里孔殷為 廷臣所舉  
留不得去入與纂脩孜孜不怠得疾旅舍予以事冗不得  
早夜視之以為至恨但少間時得一會語不及私不數日



竟死嗚呼其爲痛宜何如也將殮之予視之猶見其血泪  
相和以流予兄大紀與弟淳夫往殯之城南之鳳臺里將  
以月 日題葬于鄉山之原其家世與予有連曾祖  
崇德龍泉教諭祖仲温父彦政母劉氏劉氏之母先大夫  
人同產也其母早亡大夫人視猶已女而江氏於予家比  
鄰也兩家往來甚密仲温之死也因哭先君子卧病歲餘  
予歸自京師方疾起予坐語移日不數日遂卒臨終但  
語孔殷以力學大其家可謂光榮如其志矣而竟止於是  
耶其配王氏有子一人曰爨銘曰 其才學之偉而志氣  
之巍而父母之鍾愛而國人之期待而可謂遇時而命之  
衰已而已而

夏侯時雨

庚午


於戲飄風雖驟不能以陰雨揚其塵蛟龍雖神不能以白  
日離其倫博碩龢裕德文之志雖賢不能自必於用雖用  
不能自必於顯通此所以多鬱迴轆軻而卒以因終也古  
稱文人相輕余識交天下士道其鄉先生文儒紛教謗譽  
角起究不可一差豁然不足啼獨山東豪傑文武士與吾  
鄉雋庸人一口說夏侯先生霽學行山海可仰師於書無  
不讀讀皆通通則慮慮得善取予服守篤踐以教人無髮  
倦髦且益孳以故人皆悅從弟子進者將先後數十百人  
而波其贖者盖不許矣又凝遠其風度不拘急若東縛者  
霞絢瑾正宴笑因事誘論尤傾動其座人歎懌忱化不自  
知覺夷儉艱通不爲憂豫泰如也家居八十餘皓皓鬚髮  
儼衣冠温然不怒甚可愛敬此衆人所告予也今年春有

儒者養生其字手文字一通大戚邑邑若有求請者謁入  
 且言則先生冢孫狀其族來請銘也嗚呼予生二十餘年  
 間先生十餘年矣且我在紀善惡敢辭銘按狀則先生字  
 時佐鄉稱時雨先生生元至大庚戌七月二十二日戌時  
 歿以洪武庚午十一月二十七日辰時塋于鄉之西車井  
 頭龔配張氏繼室劉氏子男四人銓長文華應華文鑑劉  
 氏出也皆先卒獨銓終養二十五日并卒女二適張伯昂  
 曾應復孫男四泓即養直也源温淳銘曰 粵稽夏侯萌  
 藥於譙裔遷長沙髮吉是僑瀟水之滋顯衍孔昭代有卓  
 傑在唐曰韶歷宋逮元暨于 昌朝兩有文武擁旗珥貂  
 蟬聯有耀激其青霄猗嗟先生舍華在朝腹郁孔凋窺規  
 似姚一命司教吉士惟杓再命臨川撫民不怵河澗膏

星輝岳岌金精失馭卷懷 軼超邁于熙和孀于德輶齊魯  
 大邦仰之喬喬自南自此 感茗聆劄允也君子士林之翹  
 人誰不死公有賢子子肖 孫哲億年未死我述銘詩以昭  
 新阡從祖公友燁有舊文 公未通顯而克長賢賢者孔多  
 聊一炳于潛德有糴卿雲 在天刻辭有泐斯文未傳匪文  
 則傳世教不刊

周夫人宋氏

於戲閨門女德之常固興 家之本而艱難運會相與扶持  
 相助涉險復安光昭後嗣 至隆休慶詎可少哉吉水泥田  
 周氏顯盛自唐中葉宋季 路銓公以仁壽鄉著名廷秀君  
 在元盛時居邑中尚志君 遇亂槎溪宋氏壻畜之與文君  
 豪傑有智鑑曰非悟女有 歸老身惟此可托也已而塋之



盡禮有所愛妾尚存護之爲人所難宋氏不以一毫家居  
自恃也不以周宋財產有所豐嗇不以周宋族姻有所厚  
薄不以二氏之祀享有誠偽事夫益致其恭順教子益盡  
其義慈艱難運會女德之常至於如此也豈不有間哉是  
宜爲銘其生以至正庚申沒以洪武庚午葬鄉之後坑子  
男三人曰彥清彥奇南異也銘曰孝以義不驕智以慈善  
教不裕其年益其後

仲異陳君 辛未

吉水俗尚儒學敬老尊賢豪偉之士喜賓客重然諾輕貨  
財親師取友畏敬奉承洞洞屬屬然少時所目睹仲異陳  
君其一也予叔祖季通先生抱負奇節在元盛時雖吳文  
正公虞文靜公尚不屈意事之國初郡縣萬方辟之不

肯起人無賢不肖望之屏息其氣象蓋如此歟主仲異家  
師席二十年無所忤拂間嘗稱其豪偉之士則仲異誠有  
過人者歟非有過人之量者不能也賓客愛其禮友朋稱  
其厚家益費而益饒襟懷洞然志氣軒豁慷慨赴義世不  
多有於臧豈不深可惜哉君生至正辛巳年財四十有八  
以卒時洪武戊辰五月三日也娶城東戴氏同水王氏子  
男二人安字叔寧鼎字國暉女三人長適城南胡子淵次  
適富田蕭永清幼適里中董源孫男麟字公姓端字公正  
綱字武模望皆幼君沒四年辛未二月十九日其子奉  
君之柩與妻戴氏合葬于吉水之南遇異人指示其穴克  
符吉占君之父文彬尤忠厚相傳爲義門之族云銘曰  
陳氏之先有積德君襲餘慶秉義烈慷慨豪舉慕先哲親

師取友淑後昆表著英發中和淳堅珉勒只聲云云

文西山劉先生 丙子

古彌鄉先生歿而祭于社祭之何也教施於俊良俗成於長厚仁義所摩禍亂不作法施于民則祀之祀之宜也故西山先生劉公子彰始歿而人悲之既久而益思之所至祭祀之所宜也矧其子弟門人狀其行欲銘之以不朽余可辭銘哉按狀先生壯年敏英家門儒貴素位雄豪不解窮促言論鋒發辭義卓然鄉多儒者歲時過從囊出其文字上下頡頏其門如市及丁亂從祖趙州公舉宗奮義日夜戰其鄉闔門多戰死子彰亦幸而不死隱憂致病晚益羸喘洪武庚申以賢良徵詣京師骨立竒悚遂以得還遇喘時或坐以達旦嗚嗚然諷詠書冊不離手與疾忘苦

洪武戊辰縣官聘迎之訓導于學鄉人始知見吾人師弟子之禮其病卧于家弟子羸糧景從拜牀下受請指畫皆不逾時貢于鄉舉于監丙子之秋一日余方坐其館座上

有報曰趙哲先生徙也舉在前列先生之力也衆賓客闐然走賀喜兒童婦孺相問語喧動一市人維先生行過其父其父殷勤謝又報曰劉宗平生生徒也舉在前列先生之功也則又族擁先生行過其父其父殷勤謝又報曰先生令子迪哲前在試操筆疾書即投卷嚮蚤出漫不加省迺徑得捷轉相賀先生先生扶杖接拜跪不勝杯酌因謬曰吾弟子與子將圖佚老爲朝夕養一及門輒欲去老者何所復望哉既而歎曰吾負荷先人遺業守經術以崇正關異病且死不敢蕪其勤以淑于人今幸而有子若弟子將

施於世死不恨矣未幾遂歿時洪武丁丑二月二十五日也然則雖如古人釋奠可也非祭于杜而已也先生家吉之泰和宋初徙吉水文曷夏朗高祖新民宋寶佑進士曾祖實翁元貢進士號竹坪先生伯祖震字庚振元進士朝列大夫知趙州世稱澄篋先生祖庚達號竹西先生家君外舅也父諱鳳字孟敬至正貢士母張氏公生十三年而孤事母孝趙州公及叔父貢士君鶴臯教之甚篤先是人稱夏朗劉氏治尚書有名雖歐陽歙八世家傳迨弗能過元盛時王克耘等皆出其門今惟先生得其奧以力行天性嚴與人義善謹諧不爲虐建祠堂脩譜牒親親恩厚白首不渝有四書要覽文集若干藏于家生至順壬申十月二十七日得年六十六娶顏氏進士顏成子之女子男一

人迪哲也名桓女適曾希參者後月餘以衰歿歿將塋于沃塘山之源銘曰 蠹餘燼木多糟粕渾噩授受漢已鑿天昭漢回出伊洛閩閩鴻碩維有作南渡惟吉檀郡斷蒙發劉氏顯孔焯竹坪蒼篋上下齧出其門者齊橐籥王氏之子益舟艘先生還淳守其祚授黜吸飽則嚼注之不克溢不涸夸盈務靡鎖确格捕影捉泡醞深藉榛窄不服施鹵所先生之徒一渠護吁嗟斯文重開拓宇宙所禪厚不薄此銘此行古可也

辛雲先生

庚辰

歐陽文忠公十六世孫諱衡字師尹學者稱辛雲先生至正舉進士遇亂遂不復仕吉安守臣梁克中檄舉義旗先生即遣子率豪傑千餘人首治水軍與賊戰摧其鋒屢建

勞績竟死於陣先生以書言陳便宜主將不能用先生曰  
事不可爲矣隱居山谷間時四方大亂尚有學者義而從  
游先生不拒也入國朝屢有薦者嘗再至江西行中書  
省皆以疾辭與先公同年生而日月稍後兄事先公先公  
之應詔赴闕也曰吾必不仕將以死自誓子幼無可托者  
此可少念耳先生即許以子妻予兄謂先公勿憂也已而  
先公亦得告還人皆謂先生友誼無媿古人也先生於書  
無所不讀讀無不記雖山徑地志稗官小說醫藥之術皆  
通稱融會予少時因市得四書集成關鄉黨篇先生口誦  
予書之已而得本較之不謬一字而是正居多其精博類  
如此平生未嘗疾言遽色莊肅而和易學者嘗謂如先生  
誠所謂恭而安者也所著文集凡若干皆可傳先生沒以

洪武庚申年六十有八世爲吉水螺陂人其先自文忠公  
之孫紹世得師符居吉水積符至諱零者始家螺陂曾祖  
炎起宋進上新昭州教授祖慶旗進士靖江軍節推父吾  
衡其墓在龍塘山之原子仲訥早世有孫忠孝少長予家  
今而請爲銘於其墓故叙次俾刻之銘曰文忠餘慶河漢  
翰漫灌川陸草木莠俾其根抵枝扶疎文章懿行與之俱  
博學隱德伍櫟樗將施後嗣仍環瑜不信請考大史書

### 周吾文

於戲予二十餘年見周氏祖子孫三世讀之家書見余從  
祖父及先君先叔父之文爲周氏作者亦多有之而其家  
字吾文者先君嘗謂予曰善承其父志其父宗祥其季父  
宗瑞兄弟友愛之人謂宗祥仁凡宗瑞悌弟吾文令子余

少皆不及拜其門而識之予家孰謂宗祥兄弟之墓皆予  
爲文刻石識之而吾文之子且哲復以翰林蕭君引高所  
爲吾文行狀請予表其墓而爲之詩安得不重爲感慨歟  
按狀吾文諱琛兒時穎悟好書大父木立長者有智鑑嘗  
曰此奇兒也必與吾家出入與俱設疑難令剖決出人意  
表及理家事非非就緒如老成人元季之亂佐其父舉義  
兵保障鄉里攘斥群寇禮下賓客撫納流亡所存活甚衆  
以功陞吉水州判官家吉水之醪市人也共榮之已而內  
附從鄂國常公攻下贛陞吉水州同知而祖母鄴氏卒因  
謝病免散其兵爲農事事親極孝養歲時宴集賓客之盛  
輿馬昭映固已下視陳孟公之流其一門四時同產合食  
庭無間言雖占稱義門無以過之也於戲使吾文父子至

今猶在也豈不成就爲鄉之模範歟於戲惜哉其生時泰  
定戊辰歿以庚辰葬于鄉之草子山之原母陳氏妻陳氏  
子男三人宜大宜氏宜哲也詩曰有美哲人溫其如玉山  
輝晴霞風采濃郁早知學問親師擇友義勇英謀志殲群  
醜時智時愚時止時仕人謂松雲不斥其字德惠鄉閭慶  
流孫子百世之下佳城鬱葱讀茲有感尚想英風

### 高夫人

解氏鴈門人自唐天寶中宦游家于吉世有賢內助先妣  
大夫高氏唐南平王崇文諸孫逸爲吉州判官因于吉  
水仁壽鄉歸仙里後遷灞橋大夫人諱瑩曾祖龍光宋漕  
首進士時稱草窓先生祖頌賢贈泰和州同知父諱若鳳  
至正進士歷官朝列大夫知封州死於王事贈 官母周

氏封州公仕為建昌判官大夫人生於厩舍幼慧淑精女  
工通書史封州公嘗慨然歎息曰恨此女非男子每擇象  
犀金龍筆墨賜之為小楷書森正嚴密封州公調官大庾  
平江太和公就養大夫人從以長孝事重闈嘗見遺金數  
餅即避去亦不以蓄久封州公素廉有德之者致文綺數  
端門無人委之去夫人見亦不顧讀書自若其至性如此  
先祖妣徐夫人最嚴難事終身未嘗一拂其顏色其平生  
未嘗出一惡言蓋周夫人世善淑故封州公兒女自幼時  
不能相毀亦不能詈罵人其撫子孫極慈愛待下盡寬裕  
遇亂東西播遷應機脫禍涉險凝危料事鎮安出人意表  
其處貧困或終日不舉火端坐刺綉旁無知者其治食饋  
酒醯醢果蔬極滋味簡便有法著酒食議若干卷藏于家

先兄祠部公亂離無書夫人手寫孝經古文杜詩教之遇  
夜則與道古今聖賢故事及鄉里名家忠信言行記及日  
時無所遺諺壬辰之亂封州公討賊于廣之龍潭為流矢  
所中卒于軍先祖太史公死節于鄉周夫人卒于戰艦舅  
氏文海攻山寇兵敗為賊所殺一門死義夫人涕泣不食  
肉者三年晚得肺疾常在床褥唾洩棄置衣履褻易必於  
屏處敬終如始未嘗一息慢於人其天性然也臨終時薦  
兄弟一家人皆在命之曰神仙亦必死死者人所不免吾  
年七十過吾父母兄弟矣但送終備物無益於亡者吾經  
亂離所見多矣葬我必於近地朴棺深隧素衾結髦斯可  
已矣言終而卒洪武三十年十二月七日之戌也泰定乙  
丑十月十日之辰其生時也卒之明年十月葬所居鑑湖



上十一月二十三日先君子卒又明年庚辰塋先君於其  
前十步皆治命也

故元邵武路同知蕭公

壬午

元之季世天下四分五裂其間盜名字者無慮千百計獨  
閩之陳友定起徒步至列將相百戰首死爲元東南烈士  
未能或之先也當是時吾鄉豪傑多從之崎嶇嶺海之死  
不怨朝廷音問實籍以通先祖太史公真我死節事聞贈  
官先君子亦授資德大夫叅知政事詔使來自海上友定  
遣江君伯昂與俱來且說熊天瑞于顛伯昂與公少相善  
也具言友定之意先公感激目邀里中蕭克欽輩數人俱  
至顛說熊天瑞天瑞猶豫先公以大夫夫人老病不得行伯  
昂去報命克欽南逾嶺表間入閩微觀之崎嶇兩浙出金

陵轉巴蜀還寓長沙歷湘潭以歸與先公謀曰吾觀群豪  
智畧獨友定忠義殆可倚也廼復之閩友定承制授克欽  
奉議大夫同知邵武路叅其軍事友定用法嚴徃徃致濫  
輒爲營謀全活甚衆嘗引兵擊賊建陽山谷間率過千餘  
人圍數重執長刀躍馬奮擊賊首兩人直前來刺將及忽  
大呼辟易其衆曰且止且止此吾父蕭君也使誥之二人  
跪曰我嘗見獲於陳公賴君救之得生今雖衆寡不敵我  
終不敢背德而陣稍却羅拜而跪按治建寧光澤道中有  
七十者執兵而前跪曰生我者公也每思無以爲報今  
幸道經我里敢以白金百兩爲從者獻蕭君不識也其人  
各言姓名及所以營解生之狀君慰諭却其獻而去洪武  
九年隨友定至京友定死君以親老辭不仕歸田里年纔


四十二事親以孝聞讀書教子自娛祁寒盛暑手不釋卷  
閭里親戚子弟從學多所造就洪武戊寅六月四日終于  
家享年七十二於戲可謂全名盛福矣君生元大定之丁  
卯歲餘母艾氏卒繼母王氏鞠之愛逾已出岐藝不凡幾  
冠從受書於安成羅先生學教授于鄉卓然以不墜家為  
念而所以去就卒如此可謂難矣予嘗聞之先公欲為傳  
其事今予翰林檢討引高與予同修

太祖高皇帝實錄見友定之事而歎蕭君之不可作也引高  
亦感泣奉狀請銘予不敢辭也按狀公諱寅字克欽其字  
所謂文章曰舫中集晚自謂舫中叟學者稱秋舫先生系  
出齊鄱陽王後居山東有諱忠國者事宋高宗為吉洲防  
禦使子文仲婿吉水城西張氏子孫遂為吉水人高祖與

簿公文布曾祖信可祖德求父雲心皆世積忠厚連姻仕  
族君娶艾氏先卒繼娶王氏徐氏子男五人長仲高其季  
子奎高皆胤公卒次引高次馮高次持高皆能世家女子  
三人適仕族孫男十四人曾孫男三人以壽終之歲葬君  
于邑之仁壽鄉落塘山之原銘曰 有偉蕭君世之通儒  
縱觀四方識其庸愚得所宜居之死不回從容進退鍾鼎  
若遠蔬食之甘常布之温天錫壽祉有賢孫子毀譽之真  
身後廼定盍視厥家惟善無競

處士周君子深

君諱源字子深周氏世家廬陵自吳將軍瑜之子都鄉侯  
胤廢徙廬陵之烏東後當忍還以疾卒因葬焉少子留家  
塚傍傳至諱楨者知吉水縣因家于櫪坑再徙至今之桑



園子深爲桑園人曾祖希賢號隱園宋咸淳庚午舉進士  
祖方瞻父仁母傅氏君生而溫和易直才畧通敏篤志于  
學師事玉潤黃先生萃耘歐陽先生皆元季大儒經學粹  
善講說尤以節操稱之君事之盡禮一先生傾竭教之盡  
得其說而於書春秋之旨蓋豁如也君少喪母扶柩葬之  
鄉之東壘會天大雪驟積至尺餘寒甚衆皆股慄停柩附  
火君哭泣痛絕獨俯柩傍乃皆不知蓋其孝思至性也嘗  
闢地構精舍積書以訓子弟歲時親戚往還賦詩飲酒盡  
歡無忤喜事周恤藹然忠厚人也余嘗見歐陽先生為言  
以子深之才使究其所學蓋未可量者嗚呼豈以君以父  
喪哀毀致病奄忽而終年纔三十四娶曾氏有懿節自君  
之亡也三男一女皆幼至今又十八年長子恒字孟徵恂

字孟璉其季悅也女適羅氏孟璉余兄之子壻也嘗謂  
余訓之後嘗從孝于京師今將改葬于鄉山之原  
乃以狀求余銘銘曰世德之儒粟温瑾瑜居財務施篤  
志詩書軒髯論事矻頑訂愚英靈不昧落月庭除後嗣之  
賢常理不渝於昭潛德可耀簡書

大明吏部尚書陳公

余奉 詔纂脩

大明實錄觀自歲癸卯戡定陳氏彭蠡之戰全勳星象聚  
咸見而四方豪傑之士雲合響應輻輳而爭趨之雖湯武  
之得士未能如是何其盛哉至歲甲辰即王鉉而浙江  
取次乎若廣信陳公脩

大祖之尤註眷者也是以首擢理官講畫律令崇寬厚而省

繁苛復倫要而黜姑息光明正大四方翕然知有一統之制作由此始焉繼而又為兵刑之大者也唐世府兵之制稍為近古而未精密乃擢公兵部郎中而所以任將帥養士卒得內外相維之體兵農相咨之意遂為萬世之法而公之昭顯成德益以著焉

太祖初即位山東新山念濟南重經王氏之亂民墜塗炭尤甚大將多練兵屯田其間非公莫可治也遂擢濟南知府居二年而政成

太祖嘉之以天官六曹之長而明經習制建官均職惟公是宜擢拜吏部尚書引據古典參酌時宜審地劇易制事繁簡貴賤疎數遠近寬嚴課功覈實賞錫黜陟之類皆公啓之未幾卒于位繼之者莫能移步也今嘗謂

太祖之治天下也其事有緒而若素定于畎畝之中誠所謂天授之者而一時勲舊臣才碩德道全方備皆非近世之所能髣髴其一二者也於戲盛哉今尚書之公沒四十餘年始得其子九成爲之狀求爲之刻詞于石按狀陳氏自彬始有聞于信之弋陽生應隆應隆生文光號南隱贈迪功郎生萬理字德甫號梅澗任信州路歷山長教授贈黃巖州知州生三子曰誼曰天驥曰敏孝字志仲號亦梅官至平江路總管府治中弘字仕遠謫韶州路乳源縣主簿公之父也母張氏生至正辛酉九月十九日歿於洪武辛亥七月十三日享年五十有一塋梧桐馮夫人楊氏今年九十餘公沒二年九成奉母隱居于桂徙南寧今家于貴縣之郭門有子三人曰鏞曰銘曰鐸鏞之子璉銘之子璜

鐸之子璫為之詞曰 廣信之山龍虎鬱盤 弋陽九華連  
峯噴岫 篤生偉人 逢時經綸 悉所宜歸 乘運躍鱗 聖人  
好生明刑 飭法與定 章條惟存 欽恤制兵之宜 因仍歷世  
寓農講武 經久無弊 山東初下 兵民雜居 朱幡皂蓋 往來  
無綏 暮年政成 歸掌銓衡 平均四海 位冠六卿 我抽石室  
用纂六經 敬服德業 副其聲稱 著之簡冊 復為此銘 邦家  
之光 閭里之榮

故元閩海道廉訪使孫公

公諱璫 字廷璧 其先吳安成王之裔 家于素之許頭八世  
祖汝亢 宋治平中判吉州 因家焉 公由是為吉人 曾祖仕  
清祖逢原 父清淑 號碧澗 以公貴 累贈至奉議大夫 大常  
禮儀院判驍騎尉 吉水縣子 母鄧氏 累封夫人 公少召英

偉之氣 壯遊元都 與兄克順 建佐俱 諸公貴人交口薦譽  
之 從事典瑞院 為典和路 經歷廉謹自持 而綽有餘濟 典  
和當要衝 歲中車駕所經 供億浩穰 無不應辦 而民無苦  
調 河南行都水監少監 治水利 有聲 超擢僉湖東道肅政  
廉訪使 司事 復陞閩海道廉訪使 時天下已亂 獨陳友定  
起步障 閩海公與之協謀 守城至十年 友定敗 亡公脫身  
歸隱 五岡峯下 自號樵菴 享年七十有六 無疾而終 洪武  
丁卯十月二十八也 公生元至皇慶壬子 於先公為莫逆  
其往元都也 里之豪傑 周公敬存 龐公文昭 郭公中鉉 鄴  
公師愈 與先公兄弟俱 復又同旅 邸至入仕 皆相先後 晚  
年家君 辭榮杜門 獨喜與公商 祥山水 間公又買山種樹  
欲與鄉先輩 書義塾 以惠教 後孝歲時 往還 詩酒 追香山

睢陽故事公儀狀甚偉聲如洪鐘嘗與先公議論余時雖少未嘗不凜然侍側知公爲前代儀刑也而今不可作矣後生末季將何所依歸也歟公娶劉氏封夫人子男四人子秉子復子楨皆先卒子崇泰其季陳氏出也公之嫡孫仲良不遠千里遺其子自立來京師請余銘公之墓墓在鄉之龍塘之原公既有玄孫矣孫男二仲良仲質曾孫男自立自強玄孫瓊瑤玄孫濟徵沂瀦澗淳銘曰 江鄉之奇英勝國之全節有浚者泉流無竭

### 周宗振

宗振諱震姓周氏其先自唐長慶中家于吉水泥田傳十五世至雪堂先生諱琦徙居諱溪生茂初仕元社稷署丞生仲原諱郊宗振之父也宗振少穎敏而溫厚在群弟子

中偉然可念族父九鼎仕元以便冝行處州路總管事有智鑑嘗謂仲原有子仲原亦奇愛之當時名儒若書隱謙二李先生同里閉朝夕俾從學安成劉先生雲章河南艾先生元暉資遣之卒 學遂有成元末大亂仲元舉宗奮義上承藩閫下保鄉閭撫納流亡禮接賓客內治家政奉重闈和兄弟睦族姻雖當天下幅裂之際周氏一家一鄉熙和樂如未嘗亂者宗振父子非可謂豪傑之士歟宗振之處亂世克承父志已大非人所可企而及其遭遇 明時孝弟禮讓之風著乎遠迩每歲時家慶仲景原華髮交彩衣先後郁然而盡宗振既沒十餘年歸自 京師拜仲原於諱溪仲原與予稱道其孝友尚潛然出涕也退而與子子堅子殷即其釣游之所與讀書之處圖書具

存蘭蕙變葉疑其精神尚流動於芳馨韶潤之表又云其  
姿貌豐偉善談笑不至浮靡蓋毅然可想見也嗚呼若宗  
振之有諸中者固不可逆度然既及見其父之賢又觀其  
子孫之高盛雖天既其年而其有諸中而足庇及其遠者  
不待逆度而知也今年子堅來奉其宗人君所為狀請銘  
其墓按狀宗振以元至正甲申五月十四日生沒以洪武  
戊午三月二十九日年三十五墓在文江下鰲山之西南  
毋楊氏妻李氏皆有懿德李氏撫養訓誨諸孤以長為族  
姻所稱羨後二十六年卒子男三人曰堅字子省早卒仲  
曰剛子堅也季曰孔子啟也女二人長適劉彥澄次適龍  
彥資孫男壽康敏望銘曰 明父稱孝子墓其慈妻服其  
義冥其家人亦克永世

處士劉公文明

處士劉公諱澈字文明系出漢長沙王後縣長沙官吉之  
泰和因家于仙槎鄉石臺宋初有諱厚字濟川者徙家于  
吉水瀘江之沙田濟川以字行咸平三年進士及第為黃  
州司理韓城尉累遷殿中丞判廣州上騎都尉賜緋魚袋  
十二世至諱居仁者公之高祖九高祖之弟南甫字山立  
號月澗年十七以治尚書擢宋嘉熙二年進士第為縣安  
遠能去淫祠人稱神明警敏絕倫最為丞相江萬里所重  
歐陽守道雖與為輩行然師事之其學傳於公之曾祖字  
由聖號方壺先生大父諱芳字士楚環梧奇偉自雄其才  
府檄補永豐學官不就毋蕭氏夫人善治其家即池亭為  
塾禮延明師游學 若提舉中齋劉公小軒學士曾公

皆為莫逆友五男子皆有文章中子鎬為湖廣行中書省  
掾迎之就養時年已九十餘玉立甚偉談論卓然見者莫  
不驚動後無疾而終公之父諱鎰字信中號信齋季父諱  
鐔字持中號龍津年十九以尚書魁貢士江西宦游廣海  
所至講學若金華蘇公伯其高第弟子也方元之亂也處  
士公與從兄文初弟文振以信齋之命舉義兵保障其鄉  
事父母盡孝季父龍津愛公如子公事之如父其疾也侍  
執湯藥衣不解帶三弟皆早卒撫兩猶子有成女兄有遺  
孤女擇壻嫁之得所趨遭亂堯十餘喪無遺禮和於宗黨  
信於朋友慈於孤幼平居未嘗見其疾聲厲色而門內肅  
然尤好接賓客四方游士雖凶歲至無虛日其數至與久  
留者皆實不厭也謙恭禮下人藹然雖遇童穉不異也

之友家破來依事之盡禮慕義來者數家咸館舍而周給  
之為其子弟里有蕭用初其人醇厚儒家者仕為刑部郎  
中以卒二人者自視雖古之管鮑雷陳不能過人謂信然  
里人有爭競多以公言而解里有旱涉公率其衆築雲陂  
以畜洩之公廉介而熟於禮談英偉料事明決邑宰之賢  
者知公而不敢辟舉每行鄉飲酒禮公深衣太帶從容就  
位人望而莫不敬愛焉公生元泰定甲子七月十一日歿  
以洪武末樂元年十一月十八日享年八十臨終不亂呼  
從弟文同至與家人訣夷然而逝母鄔氏娶顏氏世嗣微  
音子男三人楫字子川早有文學才名尤善書仕為兵部  
主事以卒檜字子植朴字子素仕為九江學官亦先卒文  
子三人王伯齡顏朝偉蕭維舟其壻也男孫燦勲燁煉煇



煜焯燾炳燄孫女三長適王良翰林脩撰次適蕭審幾曾  
尔雅公墓廬陵淳化鄉消步之原銘曰 余父與文明劉  
先生善其諸子又皆與予善其父子在時如景山嵯峨群  
玉輝映今獨其中子在予銘其墓嗚呼余銘不辭不能不  
為之出涕也

孺人胡氏

往年予新免喪叙大夫人行實表揭于庭中書舍人鄒君  
尚友讀而太息曰世但有孟軻氏耳若其母之賢而其子  
不能顯揚以白於世者固多有之蓋深有感於心者予哀  
未忘得從君問其詳也今年鄒君哀麻哭泣奉其母孺人  
胡氏行實來請銘予又讀而悲之鄒君之行義有遇人者  
父母之訓入於其心而不忘也其尊君之言曰汝母年十

六始歸吾家吾既失怙恃汝母以勤儉相吾起家歲時祭  
祀賓客之供伏臘之資常有餘自汝母入吾家宗族親戚  
長幼皆稱其有禮子姪皆慕其慈咸獲皆懷其惠內外無  
間言汝蓋思所以顯揚之且勤治其家俾吾一人之佚其  
老也鄒君兄弟三人受命惟謹皆服勤力穡敬以供養君  
尤篤志為士世父惟一子為朝夕養有司迫遣之入縣學  
為弟子負世父大以為戚孺人請于尚友之尊君曰君之  
兄惟一子不得旦夕侍膝下竊觀兄之戚君亦以為戚也  
然君有子其季既業于士矣蓋以代之幸而克顯揚非惟  
君之子顯鄒氏之俱顯也其尊君躍然以喜曰吾志也曰  
吾方欲啓齒而君先之即往白于縣以尚友見焉縣為之  
喜即許代之學距家六十餘遇休假歸省孺人必問所業

及交際所聳見有新益孺人喜又必有勸勉否則雖不愠  
終日竟不出一語尚友自若無所容由是益不敢怠克貢  
于大學蒙 恩歸侍復舉于鄉登進士第甲科授中書舍  
人 錫封父母謁告歸榮孺人又曰若知所以得高科躋  
禁近承天寵乎對曰二大人教訓所及曰非也自吾聳汝  
家世積忠厚隱德未報若父平生未嘗一念不為善惟日  
不足吾不敢違其志是以尔得至于今日也若徒恃善教  
善讀學以臻茲寵榮亦末矣不可恃而怠也於戲是可不  
謂之賢母乎本其世家母儀有自胡氏在秦和野陂族大  
以繁宋季福榮翁從丞相信國公起義往來書札至今猶  
有存者翁之孫守明尤以隱德稱孺人守明之子也母王  
氏亦令族孺人生元至正癸未八月六日沒以永樂元年

二月八日薨于鄒氏四十有六年子男三人世守尚友名  
進士曼女三人郭天錫郭敬簡郭良婿也孫男崧常金如  
離鄒氏世德于吉之萬安縣孺人卜墓于縣南塘山之原  
銘曰 世稱慈母慈母敗子貞哉孟陸光于信史孰為父  
母不悅賢嗣身不行道訓亦徒然燻肉教信斷慈以度誠  
壹開之其誰不悟惟此明媛蚤歸于鄒四十六年古人匹  
休克相于夫白婦宜睦于宗族

倪夫人鄒氏

少時讀書傳見鄱陽季友鄒先生音釋時時有補蔡氏之  
闕讀四書輯釋見新安士教倪先生所會萃而折衷也心  
深慕之蓋三十年而遇以孚倪貢士來大學奉其先母夫  
人鄒氏懿德行求為之銘墓乃知士教先生其族祖季友

先生夫人魯大父也晚生末學得以稱述少慰其三十景  
慕之心也何其幸哉按狀鄒氏世家東魯季友之先徙居  
鄒陽興德縣東七十里曰朱田夫人之先府君恬於勢利  
與倪公澤一交厚元季同兵于鄉之大田北上坑夫人甫  
六歲以孚祖妣深可愛之又六年遂聘焉明年夫人之母  
吳氏卒遂鞠于姑笄而成婦衣服飲食所以奉舅姑者一  
出于夫人之手妯娌盡和視諸子姓猶子鄉鄰有貧困疾  
苦隨其力周之舅姑之喪不御酒肉者逾三年事祖姑盡  
孝初喪其父時繼母弟幼喪葬周恤盡其情側室黃氏有  
前夫子後亦有子育之盡其慈每雞鳴而起夜則燃燈紡  
績課諸子詩書以勤儉相夫治第起家至康俗成隱德鄒  
倪二氏先德之隆尚矣所以維持而中興之者夫人皆有

力焉於鄒可謂孝女於倪為孝婦為慈母是可銘也已其  
生於元至正庚寅二月十四日沒以求樂癸未六月二十  
日得年五十四塋于鄉之楊邨葉家鄒子男三人以孚以  
達以德黃氏出也女子二人同壽適鄒氏王章適祝氏銘  
曰 顓顓世家閨門肇化孝事重闈淑德逮下胥宇崇崇  
人蘇歲豐祭祀賓客處罔不共肅肅雍雍相夫之功視彼  
小家悍妬浮華曷不感茲樛木螽斯雖不末年世豔其賢  
金石照地蛟龍騰天

故監察御史陳公仲述

甲申

公諱繼先字仲述姓陳氏其先金陵人也十八世祖暉始  
居吉之泰和族盛至數十人業儒多宦達鄉族無與焉比  
有諱俊者尤多陰德俊生申申生先得學行純正號菊存

先生元初爲贛州路儒學教授致仕以子貴贈萬安縣尹  
公之高祖也菊存生學禮仕至贛州路推官致仕公之曾  
祖也推官生以道潮州路儒學教授公之祖也教授二子  
長曰有慶即公之父也公生元至正庚寅四月三日推官  
書而假寐夢神人持一皂纛豎其聽事前寤而生公推官  
大異之曰必亢吾宗稍長穎悟異常見七歲善屬對授教  
先卒推官鍾愛之未幾遇亂推官沒家益貧國公撫穉弟  
獨與母蕭氏居姑婿劉崧憐而教之學通詩經而又肆其  
力於古文隆寒盛暑手不釋卷庶幾貧而樂者也以郡學  
生登洪武乙丑進士第明年擢山西道監察御史調山東  
道出按治山西福建聲光赫然小民與士大夫之賢者皆  
愛慕之還調廣東道決獄稱平勤事不怠一時章疏奏數

多出其手暇則爲文自娛求者甚衆亦不拒之四方名士  
識與不識皆稱陳古文而不名自來京師夫人曾氏留  
家養母獨居舍一榻蕭然亭無童侍蔬食水飲十年如一  
日往來書問至家幾百餘帛無一語及私利洪武癸酉六  
月二十一日歿于官沒之日橐無餘貲篋無完衣廩無餘  
粟遺書數冊而已聞者莫不悲之曾氏同里人紹有先生  
之女亦能其於窮約予一人曰賞未樂元年以春秋舉其  
鄉今年會試黜于有司蒙聖恩得還鄉里廼持其表兄  
翰林脩撰梁潛所為公行狀請予銘嗚呼悲哉予少時家  
兄大經歸自府學得公所為文家君讀而稱之曰故家有  
子孫後又得公庭對策讀之益知羨慕後官京師始與  
公相識同朝者幾四年往來情好甚篤公廣額隆準面目

嚴峻身若不勝衣而言論確然人皆謂誠端士藹乎其可親介乎其不可于以私也今往年已嘗為公銘忽夢見公以為未足以得公之詳而公亦未塋也今公之子嘗始克差公于龍門山之原而賞之篤實又甚似公予又慶公之有子也乃悉按狀而為之銘曰 有備陳公出于名宗休祥先徵譽望益崇鄉稱碩士為名進士為才御史傳以文字籍湜之徒可參翱翔擬倫絜矩公有剛 龍河如池毋媿如砥有銘斯阡有頌無已

周君子仁

元季之亂吉水泥田周宗謹舉義兵保障其鄉 國初徵至京妻子偕行辭不仕題 田里未幾與其長子皆卒妻劉氏與少子原方五歲劉鞠育教訓之宗族維持之以長其

字子仁遂卓然立有成朋友稱號之曰槃澗劉氏之能教宗謹之餘慶也其先都鄉侯胤之後居烏東自唐長慶中始家泥田曾祖方平號樂泉仕元為廣福監丞以子贈飛騎尉未豐縣男祖志安永順安撫司蒙古教授早世蓋兩世以遺孤自奮所以為難能也先世有屋泉溪上兵後蕪廢力治之樂施禮賢內顧屢空而坐客賞滿毋劉氏多疾悉心奉侍以孝聞劉疾亟諄諄致教自誓榻前塋祭盡禮奉先謹事長敬處鄉族和蒞官事慎魚池園蔬無負租布贏羨上侍叔祖諶陽隱山二翁盡敬養時家慶兩翁華髮輝映尊俎一門群從雅歌傳觴蹈舞先後衆皆謂周氏之福也耿介重然諾人有過面折之有爭者求直片言理解輕財好義族有貧不自存者常推濟之毋劉兄子少從依

居如母志俾有田宅每歲代穀於人視年之豐歉為息錢  
多少人樂輸之治第種花多釀林宴賓客簫鼓沸然奏連  
日夜不厭意氣豪爽而中情藹如也近歲鄉民為亂相戒  
毋毀其居室傷其薪木非有恩愛及人焉能致是乎未樂  
甲申夏四月得疾弗愈呼其妻子教戒之命其族子公明  
狀其行言畢而逝其生以至正壬寅六月六日歿以是月  
十三日年四十有三葬于鄉大畚山之原娶劉氏事姑孝  
相夫順訓子嚴其所以能自樹立而是者內助有力焉子  
男三人長曰未次曰順女五人未字士未奉狀求銘銘曰  
少孤植立有卓識榮親睦族喜賓客惠利及人沐膏澤  
棟梁之資拱把厄孫子綿綿食潛德

蕭益清

先君子為言在吉水元盛時西隅馬氏賓客之會衣冠談  
笑江風山月皆可傳說而其時潭碧蕭先生可達馬氏壻  
也先生伯祖深夫提刑其家之規模施設又甲於江鄉兩  
家利澤豈不盛哉予每聞而心識之幸而識先生之子益  
清已八十餘矣邈遑凌雲之氣清純博雅之文蟬蛻出塵  
之高致先生可想而見也後數年而益清卒深恨見之日  
淺不得考論往事增益其所未聞也其子伯禹與予善伯  
瑀子淮又間從予游於是以墓銘為請按狀益清諱堉晚  
號清溪釣者唐八葉復之後居長沙至諱霽者徙居廬陵  
沒後遺言謂其子徙居吉水之螺陂又三世至定基兄弟  
始顯名益清定基弟世基之十二世孫也高祖中行贈宣  
教郎曾祖德夫贈迪功郎祖莊叟父可達俱隱德弗耀益

清生而聰敏通詩經學貫穿諸史高談極論坐客盡傾尤  
工於詩歌放逸自視邑大夫不難致也累蒙徵辟皆以老  
疾辭鄉之進進造就為多視其言談舉止不問可知淑人  
之功又如此誠可謂隱德君子云生元延祐己未沒於未  
樂癸未葬中鵠鄉虎坊之原配東溪廖氏生四男伯瑞伯  
琬伯瑄伯瑀能世其家女二人孫男十人公猷公輔公盛  
公叙崇猷崇簡崇魯通豫淮也銘曰 博學而隱泉石其  
清操也高談善教烟霞其笑傲也可謂人豪坦然其履道  
也子孫之多足將食其報也

夏孺人鄒氏

吉水北門夏氏為故家在宋南渡與先高祖同為大學生  
時夏上舍家簪纓蟬聯至元盛時日孜父子同薦于鄉時

爾聯魁夏氏子先大父與先君子以世契往來情好篤密  
嘗謂言其家法之善予生也晚皆不及見之矣但少時嘗  
往拜成章元配鄒氏孺人日孜從子婦也知書史時為言  
前時一門群從皆孜孜務學不暇營殖而家政咸理應事  
無乏予然後知當時故家子弟無不學學無不成者雖師  
友淵源之有自來而內助不為無補也孺人出自豐家而  
父母鍾愛之而無所筆驕逸之習有女兄早失母愛敬備  
至至其嫁之資裝躬親理之推讓其所欲無所吝惜人以  
為難孺人初嫁時逮事其舅年已八十餘矣喜賓客日為  
供具孺人躬親理之賓客無拂其意者養舅姑尤盡孝姑  
自嘆曰吾晚年得一賢女鍾愛之而已出遇亂相夫避難  
于鄉喪葬無遺禮所至婦女皆懷念之至 國朝初成章

卒四男一女皆孺人教訓婚嫁外氏諸姑滿室又皆經祀  
之俾有成立晚歲尤自立具旨酒佳茗禮其塾師教諸孫  
紹續世業永樂乙酉敏求果以易經江西鄉薦而孺人不  
及見矣孺人生元至正庚午沒以永樂甲申年八十五長  
子溫子厚次曰安子安次曰莊子莊先君子念其故人之  
孤教之讀書于邑庠穎敏稱於儕輩壯遊湖海襟懷曠如  
也不幸先卒季曰澈子澂予少與相善敏求其長子也由  
是亦嘗講學於子其孺人懿行請銘銘之言者而子澂乃  
以屬予予不得辭而為之銘孺人葬鄉之山之原其處  
也為賢女其嫁也為賢婦其孀也為賢母不惟善成其女  
而教其子皆能善不惟善其家而又及其父母家予以通  
家子弟皆聞懿範有所警戒孺人至享高壽子孫盡孝可

謂全德也歟其姓李氏一誠尤敦厚士人有子課與敏求  
同為大學生孫男謙舉謙常敏道敏道動敏求也服脩  
京良震孫女適劉元素劉明 曾孫男

銘曰生長華腴不驕逸夫幼啓且翼孝順令儀  
慶無極孫競以文學名芝蘭玉樹森在庭 考懿德徵斯  
銘

戶部尚書郁公 乙酉

永樂三年八月五日戶部尚書郁公薨于仁

上遣官祭以文命工曹具視輟朝一日

顧翰林學士 戶 縉等歎息稱其才嗚呼公之哀榮始終固  
可美 國家所以待臣庶恩禮之厚尤足以激勸於當世  
公之子孫豈不永有庇賴歟於是其子彬衰麻踵門泣而



致公之治命請予銘其墓噫公與予交二十年未嘗與汝  
褻狎亦未嘗挾長殺敬禮予二人者亦自信為誠實洪武  
二十二年予侍講 華蓋殿中公始受命為戶部度支主  
事賜名新明年 戶部司屬十二年陞北平部郎中二十  
四年六月超授嘉議大夫戶部右侍郎考滿上於廷中稱  
譽擢尚書授資善大夫十三年于茲矣非才而能之乎抑  
公之盛福其祖考以來積累之慶非偶然而致也公家素  
饒財慷慨豪舉不為齷齪喜賓客樂於賑貧乏不為德也  
洪武中奏事庭中被顧問天下戶口漕運地理 險易計數  
時日應機響答無遺謬自謂劉晏以下不論也 晚歲多疾  
乃時在告 上甚憐公亦時自語予吾覺衰老 恐旦夕先  
朝露不能報 國恩吾平生無卓異惟君知也 幸與之銘

其墓紀其榮遇而已嗚呼公非可謂達歟公蘇人也曾祖  
仲和祖瑜父德字銘本公以至正丙戌正月十四生於吳  
縣洪武元年祖父遷居鳳陽臨淮縣公隨儒家焉公娶嚴  
氏綜理家政嚴而有緒彬字孟父亦克孝敬嘗厲之予曰  
他日視之曰余故人之子即比子之榮也墓在臨淮古城  
之原銘曰 古大司徒戒惇典禮馴擾兆民豈惟會計惟  
公奮身亦以愷弟恂恂休休爵祿之器歷官有年光榮後  
先豈曰其才有得于天豈無人謀不如盛福崇崇其阡臨  
淮之麓

黃君仲簡

黃君仲簡既沒之十年其女夫龐振舒應

詔來

京師奉前陳州守李君子儀所為狀請予銘其墓予兄大

紀與徐君叔通交口稱譽歎息謂宜為銘其凡知仲簡者皆言磊落可喜而悲思之嗚呼去之十年而人尚不忘與其在世無異則其在世豈無制作以過者歟按狀其既沒家亦中廢崎嶇多難理其先業而克廣之其有羸財輒斥以起其廢其鄉官陂之橋圯具甃與石要道士彭一寧董其役橋或而行者以梗楓子江當二水之交朝涉者或致沒溺置舡而濟者以喜株木陂溉田數千畝復之而歲以無旱隣里有貧民每春夏農事急無所仰食輒貸之穀而嘗取其息為家塾延良先生教其子鄉人子弟來學者皆厚待之治家嚴而有法事兄恭而有禮友愛諸弟撫育孤甥勤勤懇懇尤喜賓客四方游士過門禮接之如將不及蓋人而嘗厭當其廣席酒酣抵掌論事中共肯綮豪氣橫

放其磊落可喜蓋如此予嘗與之游登山臨水從觀闌闌之間為言其平生志意浩歌擊節當時人可其意者殊少也又謂古之人遠者姑勿論近自元季耽溺宴客俗尚柔弱鄉里富豪家士人子驟聞金草之聲手足振掉睽睽睽耳不聽坐而待斃妻子為虜可憫不足恤者何恨我先人誓天仗義奮擘一呼謀夫如雲勇果四應東摧西剪莫犯吾鄉迄為保障以迓治平至今室房有故宇圖書有故藏里人無流離之若田野無荒棄之時山林無斬薪之虐一草一木之遺皆先人之遺澤也我恨當其時尚幼目習焉不能助我先人建大勳業先人亦賚志以沒此古英雄奇偉之士所以汨沒而無聞者類如此也審其言回個儻可喜夷考其稍任事馭眾低昂有變權正合宜使愚能畏之

因其小者大者可知或時以泄其不平披橫予粵孤突騎  
獵逐平原曠野之中望之偉然文武可用亦庶幾奇男子  
世豈多有哉於乎是安得不久而想見之尚如盡世哉君  
諱敬號竹澗高祖顯民始家于吉水曾祖端叔躍淵其先  
人也君生至正乙酉七月初二日歿以洪武乙亥閏九月  
十三日 時寓京師題其喪者季弟禮與婿朱正也娶周  
氏里之名家子男四人復安既安居安太安早卒有陳彥  
素者亦其壻君墓在其鄉鷓鴣山之原銘曰 噫慨懷言  
可績才可惜金利不矛戟緝粟不為璧未秘茲石

劉君允中

劉守中河間人宋末陷于金虜天下重其醫術稱劉河間  
而不名其醫上與長沙相接下與鄆城為宗鄆城得麻知

幾為作儒門事親書能發明河間之旨世皆喜傳之予嘗  
過鄆城求其遺迹訪其士人咸其知幾能文然不甚知醫  
故其書多遺獨劉河間自能著書若宜明直格之類行于  
世者甚多然又皆非其與也其子孫後遷江南必有得其  
傳者予因記少時聞吾縣先輩劉君允中有河間秘書從  
其子彥升所借讀而歎之曰吾固謂河澗當有秘書喜其  
是矣日升泫然以泣曰先子之所屬也系本河間而莫詳  
其世數矣予以質之家君君曰有之初允中之祖芳茂自  
河間徙居江州宋季達泉梁先生以醫游江州義同倫合  
身俱題吉水焉芳茂生德榮榮生允中子七人允中其季  
也自游淳厚寡言恪然忠信撫孤濟貧不為德色至元中  
為吉水醫學教授壬辰之亂遇賊于鄉刃既及之有數人

大呼而前曰是真善人何可殺也得免所至盜不忍害論  
其學行蓋無媿於河間者也予竊識之允中人 國朝醫  
術尤振治無不愈不獲迎至以為枉死連郡人敬信之車  
輿騎從常絡繹不以早夜絕其門尤通習地理百家之言  
不自炫耀退然若不勝與人言如恐傷之生延祐甲寅十  
一月二十六日沒以洪武癸亥四月八日醜毛氏子方升  
醫有名江淮間先卒繼李氏有家法亦習於醫善訓戒其  
子文升復升日升其季也君沒時尚少能自力於學後二  
十三年以書選入翰林始克狀其行請於予曰知先人莫  
若君先大夫先大夫已矣得聞論說宜莫如君余往年嘗  
欲輯次允中父子所治其病異效事繼太史公淳于倉公  
傳因循弗果為今亦未暇細也姑其所聞大畧為之銘曰

昔在河間卓哉守真著書傳衍千載一人孫在江南書傳  
允中謂藥非補而惟主攻去病而已百發百中譬之用兵  
豈必持重我欲傳之著其治功後有作者其書可宗

彭生叙古

永樂三年乙酉夏六月二十四日廬陵彭叙古卒于京  
師會同館前之寓舍予臨視之其言不亂明日 上聞為  
之嘆息者久之先是 徵天下能書者畢集京師兩制臣  
共泣試東閣至是終月餘而竟天死嗚呼以一介書生薄  
技授 聖天子寵眷至於如此日給珍膳後猶追思之嗚  
呼是亦足以無憾矣惜乎不見其止也叙古廬陵之世家  
刺史珩之後居吉水之東螺元季徙家于烏江祖諱建中  
父子禮毋李氏有連也叙古少穎悟不群肩目如畫初從

其季父子信授徙吉水縣中予時家居無日不相見每納涼舞雩步月江渚論時學書其年雖少與子有同也繼而子信爲學官雋陽予往過之爲留月餘其學益進予被病賴中叙吉米早夜視子病危與共卧起子疾愈乃歸雋陽豈意不數目而子信死子禮不遠千里遣叙古卒業京師予館之常坐以達旦後游莫不稱其好學其在家父母鍾愛之兄弟無間言生洪武戊午年二十有八娶聶氏有遺腹子一人曰觀慧遺殯之京鳳臺門之里子禮將取其喪歸葬鄉山之原銘曰才子務學英年俊發康壯大車孰折其轄慈父鍾愛公既白髮跋涉湖江以返尔極千古之悲尔銘尔壽

君諱哲字用哲系出宋宗室漢恭憲王後五世至提舉府君諱不僂從高宗南渡封吉水縣子因家焉又五世至必學宋進士僉書吉州判官聽公事元以爲四會尹不僂高祖也魯祖啓元啓原祖叔順父存誠君生而穎敏不爲嬉戲稍長益務學好讀書寒暑忘倦詩詞出語驚人時學闕弟子負縣官聞其賢欲招致之君之父亦慨然曰當使之立功名繼前光遂入學名譽日起從子章劉先生治書經先生極口稱道之同門之士皆自以爲不及也洪武丙子中江西鄉試進士舉明年會試得乙榜時川蜀以學官闕聞

太祖諭吏部慎選江西人士爲之遂覆試君得夔之梁山教諭梁山僻縣學久廢君興廢舉敗陶頑鑄翕然遂與赤

縣等人皆悅之丁內難歸鄉生徒送之皆垂涕泣居喪無  
遺禮服闋調廣之徐聞教諭其教化益盛於梁山明年今  
上龍飛君朝于京師京師名卿貴人爭欲薦君君力辭  
曰教官吾素志也事君以身不若事君以人吾多育賢才  
以為國用顧不可耶遂不敢強歸至徐聞以疾卒語不  
及私但謂弟謀曰恨無以養老親志年經二十二君生洪  
武壬子沒以永樂甲申明年乙酉謀始奉君之柩歸葬于  
鄉水磨坑之原毋某氏娶龍氏無子子表弟翰林檢討劉  
君宗平與君同貢又同官蜀中少同事劉先生知君為尤  
詳乃述狀求為之銘狀稱君有智畧善談論美姿儀鬚髮  
郁然事親以孝聞尤善教其弟兄弟怡怡如也內睦九族  
庭無間言輕財重義喜周給其於友朋諒諒如也既沒之

明年朝臣尚有交薦之者部符下而君卒矣君平所為狀  
如此皆得其實云銘曰 宜壽而天宜嗣而無後老父白  
首扶行送柩九族衰傷士林相吊嗚呼無所歸咎

### 竒峯高君

外大父封州高使君諱若鳳號灞雪先生嘗辭官家居時  
杖屨過其族人親戚或預言其後世盛衰罔不驗每曰吾  
家自南平後家袁州遷吉水之歸仙里駙馬房族最盛今  
詩書之澤又萃於灞橋一友既食其報然官橋一房世積  
忠厚不出百年又當顯融矣予少聞之大夫入遂得拜竒  
遠於官橋之第與其弟子往還幾二十年間竒遠遇亂時  
戰爭得失之形與元之所以亡之故明著切實聽之忘倦  
其長子篔尤與予善飲酒嘗達旦譁然誼笑不為忤遇予

肆筆屢文醉書滿帙群從環列賓客麋至竒遠未嘗不為之擊節也嗚呼予自少至長出處隱顯念予不少衰亦平生之知己也竒遠諱洪號竒峯祖廷珍父寧翁母宋氏四男拱文拱武拱朝拱弼竒峯墓在里之原予為之銘性剛毅行質直勇而有禮奮義力生丙子終甲申壽非謂嗇慶後昆不在其身在于孫

處士張國賓

嘗考唐氏族誌張出姬姓青陽氏子揮為弓正賜姓張氏周宣王時張仲以孝友稱後裔張開地三世相漢至于房仕漢封留侯世濟貴顯司空華相晉子孫散處襄洛河東始興清河張氏皆祖留侯若吾隄馮翼河間中山魏鄭汲隄亦皆姬姓終唐之世宰相凡有十七人故張說出河東

九齡出始興與之通譜是知孝友之澤大以遐忠志之風扇以廣有功德於民隆以繼食其薦報者無損而增益之也吾銘處士張公國賓之墓故尚論其世公諱觀字國賓系出曲江唐末有居于永豐者稱陰田張氏至宋有居于吉水者稱外固張氏高祖自脩始遷堤平故宋義士青山趙儀可銘其墓曾祖景良有惠于鄉祖先傳從學冲所彭先生通春秋有學行申齋先生劉高仲銘其墓父尚質元季義士以民兵拒賊者四年事函師于隄還為其奴所害寇遂屠其堡公偕弟國琛賴伯母嚴氏計得脫走趨吉郡永和轉徙瀘江流寓十有二年辛勤來歸復仇理家飭已奉公整截一致人皆難之公姿貌軒偉神精泰朗喜怒不形知慮完密取友尊賢藹如也母之姑陳氏既嫁無所歸

公養之如毋壑祭克如禮士論稱之其篤於親調其急類  
如此然本於天性醇篤也嗚呼不可得矣公生至正辛巳  
七月十一日沒以洪武乙亥閏九月十三日鄉先生孫成  
允妻以女有婦德子三人長永清次永澄永澈女三人長  
適倚富蕭芳桂次適縣中北坊陳彥敬次適江口劉伯甫  
以洪武丙子十一月日奉柩歸塋于桑園之原余誌公之  
始終且為之銘曰 赫赫廬陵士民敦義桓桓相門偉也  
張氏宋元叔季祖孫奮義指天誓心謂山其礪景星慶雲  
光灵不墜篤生國賓豪傑揚抑瑚璉其相讓賢於錫棟梁  
其堪避材於櫟享有餘芳施有餘恩於昭百世契此刻銘  
侍御史滄江解公故夫人歐陽氏

夫人歐陽氏宋名臣文忠公之後自穎復居于吉水之流

符有諱芝者為螺陂蕭氏婿始居螺陂生炎起寶祐元年  
進士教授新昭州與余家有連六世祖上猶府君之塋也  
寔為之誌炎起生夢旗咸淳四年進士甲科為靖江軍節  
度推官不仕有文學兼通於醫用以濟人子衡字師尹至  
正庚寅鄉貢進士學者稱辛芸先生夫人之父也余少時  
讀先祖墓誌已知慕昭州公而辛芸先生家君莫逆也又  
嘗受聘迎為考試官同被徵起同得辭謝故戶部尚書費  
公震初知吉水以家君二人者之相善謂宜相與為婚姻  
故夫人歸于我家兄時洪武丙辰余未成童然喜為文字  
先生至余舍輒從問經史大義先生甚喜為文字先生甚  
喜諄懇教誨歷年訓詁不遺餘說每至夜分夫人具燭火  
為酒食湯茗未嘗敢言倦家君性嚴重治家剛明有法度



雖臧獲不能一出語違禮義外親子姪至不敢仰視夫人  
溫然不怒而整服於禮法家人輩稍有乖違畧顧視其容  
辭自不勝其媿者余兄弟亦素剛明余少尤明察人難當  
其意者夫人歸于家三十年中間從余兄官京師歸葬  
二親塋歐陽氏三喪其兄早卒經紀其家撫其餘孤家君  
及大夫人在時稱其善綜理予兄於家事悉其事一以付  
之無違其意者見予之幼而長仕而顯歟學而有文章致  
其意請銘其父母之墓其子禎期今年來京師受聖  
上眷知以書學選為天下第一人被特恩習書直東  
宮將迎致之而夫人卒于家豈不重可哀也已夫人諱晚  
字季晚生至正辛丑六月十一日午時沒以永樂乙酉六  
月十二日午時年終四十有五母鄭氏宋嘉定進士提刑  
剛之後余家鴈門解氏自唐世家千古余兄綸字大經與  
予同登洪武戊辰進士第余大夫人高氏唐南平王崇文  
之後元至正辛酉進士贈中書平章灞雪先生之女夫人  
之歸于我家年尚少凡女工織繡治饋之事無不循習皆  
大夫人教之也子男一人字禎期女七人長適東羅彭懷  
次適螺陂蕭肇敏次適周光華次許適下璜劉某節幼在  
室孫男二人榮祿榮宗女孫一人輝真夫人之塋在中鵠  
鄉五十二都東螺乙辰山戊辛向其銘曰漢有星兮爰  
七襄孰殞質兮無遺光勒銘辭兮示廟藏

國子祭酒徐公

永樂四年春翰林脩撰徐公旭被命為考試官無疾而  
卒上聞悼惜為文祭之勅賜棺斂送之如故事先是公

以妻子從之仕者十餘年不家食念先墓祠弗飾子年十八行冠禮而速之趨傍無童僕與公友者迭為喪主受吊祭連旬廼已京師之人莫不艷公以為榮益知 聖主所意嚮而儒者之所為貴且重也公亦素有盛名其為吏考功也綜覈名實是是非非殿最嚴甚棘棘不阿人視其面莫敢發口干以私者以敬天下咸曰徐考功而被黜者頗惡之然亦莫敢謗也予嘗與脩

太祖實錄及纂書禁中又見公之學問文章過於其所設施者甚遠而考功之名蹟又但其毫芒也於是翰林鄒侍講仲熙授以公門生脩撰吳溥所為行狀序稱公字孟昭少穎敏而沉默有高志年十四從鄉先生蔡深淵仲受春秋學即通大義能屬文為族父所竒重洪武乙丑登進士第

為浙

行監察御史入禮科為給事直日記註

太祖欲

才而用之命分教于示之房山丁父憂治喪有

聞服

鳳翔教諭考河南鄉試入 朝告歸省其母時

已疾病公倍道兼行至家母病愈後數日竟卒人以爲孝感服闋為安王紀善詔求直 公條上六事皆切當於時用薦為知州入史館考試禮部貢士時稱得人復上書言事當路忌之故除考功員外以為迂濶將不任事不知極卓卓樹名如此何其知公者少也 聖上即位擢公郎中與脩實錄成擢朝列大夫國子祭酒同僚以事中之調叅議雲南 陛辭上留若翰林廼以史館脩撰纂書 禁中為副總裁遂以此終嗚呼他人雖不能知公不悅公者亦衆而 聖天子深知之所以恩榮終始為儒者之至榮

也使公有年 聖天子所以任之豈但如是已哉狀又稱  
公性方嚴善固守不為流俗之所移學問亦非世之務為  
博洽者比文章瞻而雅居家在官盡職無所詭隨訓諸生  
皆有成就尤喜薦士所引拔甚多皆知名當時周人之惡  
如將不及疾病艱危能為盡力肯信不誣者也予嘗為公  
銘其季父之墓知其世居南昌五代之際有諱宗部者始  
居饒之樂平人宗部之後十七世孫諱式者建樓藏書以  
教子弟鄉人號曰書樓徐氏又五世至應麟登宋淳佑進  
士第公之高祖也魯祖奇夫大學上舍生祖松友考公明  
皆業儒不仕妣江氏公娶某氏先卒繼娶某氏子男二人  
恒九女一人尚幼所為文集若干卷藏于家公年五十有  
二將以某月某日塋其鄉某山之原嗚呼公之世德又如  
此而財及中壽子未有聞天之報施其不有所待耶銘曰  
巖巖徐公面目冰兢兢不撓庸俗驚嚴辭直氣矜匪爭讜  
論屢叩

天子廷有嫉畏之莫敢輕懷謗議之造不成保全終始  
天威靈思文服義多友生萬世不辱太史銘

翰林藍君日省

未樂四年春天下士會試南宮狀出囂然稱屈

聖天子臨軒覆試副榜三百三十有一人余友藍君勗中  
第二名特賜冠帶同進士及第入翰林為庶吉士又四年  
授典籍欲其盡識中秘書 聖天子意甚盛也勗亦自感  
激又三年卒于官其兄紹未遣其子猷扶襯歸塋于歐鄉  
羅富之原且為狀與其嫡子繼昌踵門求余銘嗚呼余忍

為銘哉君自少從予內兄子章劉先生學朝夕相見當覆  
試余為讀卷官去年相見飲酒慰勞甚歡而何意未朞年  
而遂銘君之墓耶君自日省與予友劉日昇生同年月日  
時皆洪武壬子十一月二十日之亥余去年歸日昇卒銘  
其墓今年歸鄉日省卒銘其墓皆余平生之知己也余安  
得而不痛傷耶日昇卒時日省尚無恙也術者相視嘆以  
為不驗若是豈其術者可信耶而以君之才志氣而止於  
是耶銘曰 藍系中山自唐居吉頡頏文儒世有仕籍君  
有顯考為都御史君少而孤御史賢子毋陳娶侯二子三  
女繼昌弟雷既喪其毋升猷從子鞠育孝誼伯允述狀浪  
然隕涕里閭有表墓門刻辭蒼蒼山水雲物昭茲

黃守一

永樂四年丙戌之冬鵬月辛亥夜夢吾之友黃君守一挈  
其囊書示予咲誥如平生然視其顏色甚憔悴黯然似非  
人也曰人謂君以前年四月死矣是豈君之鬼耶前持其  
衣袂空空然君謂之笑後泫然悲曰吾猶滯於冥漠未遽  
散也君能哀而為之銘請書之予者為之挽詩亦庶幾有  
以傳於後乎予即諾之且取片紙求為書數字為何人取  
漢書云其生在予家君辭不肯余曰君無後可托矣其遺  
書歸之他人曷若題之我俾我子孫藏之亦足為君不朽  
之托且書君生前月日可矣而不知夢覺今吾與君語者  
夢也持予書夢而索之耶則我不能知君覺而索之耶則  
又安有予書迹耶余方大悟鷄三唱東方白矣已而復夢  
為諸故人言夜夢守一索予銘其墓且為諸君求挽詩未

幾復悟日已高矣乃起握筆疾書記夢中語爲之銘君金華黃氏後徙洪之分寧宋季居安福地北門其家譜甚詳嘗携以自隨今不知其所在夫君家在安福以貴豪闔門爲人所誣陷死君一身獨脫走亡匿新塗之玉笥撫之大華遇異人頗得其道家書符呪之屬用以隨俗俯仰其非志也君喜爲詩學唐人楷書談笑諧謔動作人人有急難託之不避艱險然其義決然不隨也人有過百數之由是亦多不合余貶河州時君欲徒步來會予東歸不果後聞予至家大雪中一日夜行百餘里公至握手歡笑竟月予復抵京師君送別于清江屢書報將視予乃以二十餘年無家因贅居鵬陂廖氏得疾死焉無子君平生無玩好財貨不甚注意散寄人處隨喪不卹也蓋一下視一世云

年財四十有七嗚呼其可哀也已墓在鵬陂而之原銘曰名家之積厚不薄至於其身亦善學天之報施窮且惡歿慶之機毋廼錯嗚呼有恨纏寥廓

予既作此銘檢篋中得守一舊紙一張蓋十餘年前寄予取其紙尾有大寧書識大寧者新塗人青年有俊才不幸夭死皆深可哀者也與守一同族茲因景綸令弟題便用此紙寫一通寄去鵬陂如霖如崇如縉昆仲凡知守一者皆觀之謀石刻於其墓是故人之高誼也

高汝楫

予舅氏楫齋既歿之二十有一年其中子德奉詔來京師既見任纂之書而毋陳氏之計至倉皇南歸授一編書示予則舅氏夫婦之潛德也本其系出於南平王崇文

之孫逸爲吉州判官因家于吉水之歸仙里後又徙居灞  
橋楫齋其自號曰吾不能濟世也且以名吾齋陳氏系出  
九江義門家于吉水之馬田高氏世爲婚姻陳氏祥翁之  
女也夫婦食貧力於教其子此可爲後世法是宜爲銘楫  
齋父觀翁性狷介識古文奇字善篆籀先外大父灞雪先  
生在翁之從弟也嘗以外大父官平江有欲薦之者辭歸  
及外大父還家觀翁盡室中人皆死惟楫齋在其諱鏡也  
呱呱可憫外大父携以父官所至皆愛其淳敏字之曰汝  
楫而命之有室且曰是雖不顯將必有後此予所聞於大  
大人也先大父竹梧先生與道益張先生初典教于邑學  
也先君子與汝楫同受業相得甚後經亂離與之往來兵  
間人皆人善人雖強暴不忍加害先君子與人少傾狎少  
時獨汝楫來必連日夜飲歡笑灞雪世傳地理之學雖親  
子弟未嘗輕授獨授汝楫家君葬父母三喪他術者不信  
獨決於汝楫謂予兄弟曰尔舅不設人此予聞之先君子  
如此也至遣德從學明師陳氏至脫簪珥供束脩之禮處  
貧而樂怡怡然者又皆德之所自爲編也德字仲任今爲  
瑞昌學官兄仲智楫齋前妻陳氏孫男柱梓銘曰 既安  
既固茲父母之墓

胡時來 丁亥

君諱希壽字時來一名昶吉水東門人曾祖諱榮祖元初  
以保障功爲本州判官尤好施與建義惠社倉有司旌表  
其門祖諱拊廣東道元帥府繹史父義賢字士能君英毅  
聰敏好學問經史子集靡不涉獵元季之亂士能奉母避

兵子色之南華君少長焉即自奮白其父曰州判公徒步起鄉井惠郵窮乏名聞四方致有旌門之榮今舊居鞠爲茂草惟大人許以身出遠服賈事奉大人復歸于故里與宗派歡聚徐裔爲顯揚計未晚也父遂許之壯遊四方十餘年迺還室歸于東門至今崇墉華構壯備軒豁稱其襟懷姿狀秀逸望而可親傾情吐論不事邊幅結交皆當時名士予嘗與之登高吊古論古事成敗意氣浩然人莫能測也君毋竹塘王娶北門趙皆與予家有連予兄朋從又君之妹塔也予每與君轟飲舉自大醉莫逆君之長子正從于學所以托於予甚拳拳也予別君去京師時爲言術者論其歲在申酉不利吾平生欲立功業繼祖父不幸已蹉跎又不幸如術者之言是將遂無所成而後已乎

且遣是子入學爲子弟負以成吾志正由是益克奮勵人謂時未有子矣嗚呼而孰知君之命真止於斯而臨別之言遂爲未訣之辭也歟君得疾逆旅中知不可爲買舟溯風疾馳歸甫二日與父母妻子未設言不及私溘然而逝未樂丙戌五月十二也君生元至正壬寅二月十六日子二人長端方一字承方正也慶字善方女一人許適蘭溪曾瑾弟四人希亮希和希敬希寧正將以未樂五年十二月二十三日奉君柩葬于鄉水南山之原山向前期買石廬山之麓礱之以俟刻不遠千里奉其兄敬方所爲狀泣而告予曰先君背棄之早正於子道不能致其分毫惟乞銘庶以慰其靈銘曰 英毅之姿學允殖壯游湖海浩氣塞醉中放歌宇宙窄高情雅致世莫識齋年熾後豔雙

壁我銘誓天徵斯石

劉處士維岳

國初鄉之老成先生夏退菴楊濟川蕭魚樂以文學行誼  
師表後進于時劉公維岳寔從之游三先生既捐館而維  
岳  
岳性不嗜酒而禮意殷談笑之間藹如也里有爭訟曲直  
咸質其平能與世低昂履險而夷闢曰舍擴先世之基與  
弟維舟爰篤至父早卒築北堂以養毋士大夫名其堂  
曰孝友而南宮尹彥正楊先生爲之記能言者爲之詩此  
其有得於三先生之教然也其先有玉溪者來自永覺閩  
田父惠遠毋彭氏娶曹氏子季雅季友季克季省季瑾孫  
男十曾孫男三其諱嵩享年七十三葬鄉之傅家山季友

季敬喜賓客與予善是宜銘 銘闕

李祥雲 戊子

君諱禎字天祥祥雲其號也姓李氏族譜南唐後王之子  
傑爲吉州刺史南唐王從後主入汴已而歸守先墓在今  
安成之西蓋先主祖父以上咸在焉由是爲安成人五世  
至通甫官金陵復爲金陵人四世至于恩宦游吉水因家  
焉至君十三世矣予嘗爲其譜序君少事父母以孝聞天  
性端厚謹飭人已羨其不凡比長重然諾赴急難惟視義  
之可否不義決然不隨也雖至親狎或有過面折之使媿  
悔未嘗徇意護其私言論磊落意氣慨慷而軒豁人無不  
肖皆言敬之有賴情喜賓客真實無倦意賢士大夫至門  
連旬月延款置酒高會賦詩論文居益久而意益勤其在



元季為義士李思泰陳義治師應機畫策屢敗寇兵故其  
殖產治第內外綜理顯明周密勸合其宜至處於財豁如  
也嘗得遺金經月餘莫有言者自己物色求訪得其人與  
之語面審然悉以歸之其人頓分謝固讓不受於戲此一  
事之微然最人所難能者以其誠廉也君之大畧聲譽  
動人人皆知之自以茲為細事也嘗戒子孫勿以為異曰  
此人所當然若苟得是務則將何所不為汝等或遇此即  
若還之可也非義之財得之有禍於戲此其言又豈不可  
深信哉余先公筠澗與君交游聞此甚熟也雖古之人又  
何以過哉君生泰定乙丑七月二十五日沒以洪武戊午  
九月一日沒時年五十四叔父母尚無恙也呼其子原通  
原達而屬之言不及私其交友與西塾所延禮皆老師循

儒孜孜以道義相淑原通嗜學工詩原達敏而好禮兄弟  
友恭克繼先烈義方之訓益繼益成諸子致身青雲激昂  
步武聲譽焯然傾動遠近原通卒原達備然柱石其宗豪  
傑而忠厚又皆君之餘慶也君母王氏配彭氏先卒繼周  
氏子男三人泰原通也顯原達也幼康字原德女二人長  
適北隅龍尚彬次適城南周善政孫男十人宗白永樂甲  
申進士翰林庶吉士宗弼宗昉宗沆宗觀環傳壽振  
曾孫男繼保期冠期魁期超金穰長壽仙護琳孫瑄保孫  
女六人適西園張介申城西鮎振威王琳金灘劉庸德城  
東徐保饒上車魯徐君墓在鄉之黃原嶺於乎南唐之亡  
也以弱功德在江南尤厚其子孫不絕理固宜然而祥雲  
父子祖孫相承榮盛有加無替如此世豈常有哉予少

時與原通原達相善而諸子皆喜從予將宗弼死予聞而  
哭之痛傷其賢而不壽也余宗昉為縣庠生有聲場屋顯  
猷可期間謁予而言曰先祖沒三十年矣而墓前之石有  
刻文家君痛于懷敢以狀請銘於戲祥雲君之隱德其可  
銘也已銘曰黃原之山氣鬱盤芙蓉天嶽連峯噴其藏伊  
何世璵璠英年遇亂試危難兵謀敵氣勢誠桓豐家胥宇  
孝義存冠佩濟濟芝蘭芬中心積微徵以天后世有述未  
銘傳

高御史巳丑

公諱漸字以正姓高氏系出唐南平王崇文逸孫為吉州  
判官官因家于吉水之歸仙里高氏有名至宋始遷灞橋  
漕貢進士龍光字中甫學者稱草窓先生公高祖也贈

書右丞諱頌賢公曾祖也至治辛酉進士累官朝列大夫  
知甘州贈推誠盡節功臣榮祿大夫中書右丞澉海郡公  
諱若鳳字在翁學者稱灞雪先生公祖也父諱針字文海  
元季舉義兵復古水與賊戰于鄉兵敗死之公生四歲而  
孤母曾夫人守節自誓教育之十餘歲為僞漢兵所擄主  
將愛之任以事與彭蠡戰轉之沔陽徙建昌乃得脫走還  
辛苦以供母從事先公筠澗先生于鄉學洪武乙卯貢于  
京師試中書堂及御史臺入國學分教山西平陽府安邑  
縣還拜監察御史賞賚甚厚日侍遊宴遇事輒諫大臣皆  
嚴憚上甚悅之未幾以母老乞終養歸鄉二十餘年清  
苦如諸生人服其守

太祖賓天與俱遷河州如居鄉時今上龍飛初召還拜監

察御史用事者厭其老病左遷黃陂尉卒于官歸葬于吉水之槎坪公生元至正庚寅六月没以永樂己丑閏四月享年六十娶金灘劉氏子男三人梧柿葉女二人梧字雲榦請予銘其墓予自少時與公善先大夫兄子也大夫人教訓惠愛之甚至予之西遷也實惟公是倚託道路跋涉患難不一至予不能堪公屢開釋未嘗不欣然相視而笑曰蓋公之學問所得者深矣故聞其死時不亂且亦未嘗預言期世之貿貿者烏足以知公哉非予亦莫能爲之銘也銘曰質直之資辛苦之學富貴不驕患難可托忠節之裔益培益振其后宜昌我銘可信

劉處士從龍

洪武中里人能誦劉處士從龍在獄中所爲詩百餘篇皆思其母纏綿悲切同獄中人有母者當時莫不相泣蓋坐繫閱十月所爲詩多至如此其感動人又如此其學行豈不槩可見歟又以其母之多疾也力從事於醫處方切脉審慎通析蓋用心一故能大異於世之泛泛者而推以濟人於急不爲市利不爲德容詩云孝子不匱未錫爾類非從龍之謂乎其先出漢宗室家泰和之珠林後徙吉水文昌爲夏朗劉氏其諱孜祖叔萬父朋遠叔萬元季相叔惟允起義兵討賊爲賊所殺時甫六歲已知戚哀不肉食弱冠時朋遠輸租應役艱難百務皆能任之不貽其憂執親之喪苦塊如禮兩以明經薦皆辭不赴訓其族人親戚子弟諄諄忘倦歲饑以幣易粟力可賑者賑之而尤喜賓客過從歡飲情懷藹如篤於教子皆爲善士長曰鶴先

卒次曰德華曰彭華季曰南昌其母顏娶蕭氏其生以至  
正壬辰六月二十五沒以未樂己丑二月十二日存省  
號也墓在鄉某嶺之孫男福成福德福兆福善福集銘  
曰吉有夏朗劉擅經學處士存省懷瑜不琢孝孚於人  
人誦其言醫藥用施有先後親親仁民處窮而尊積富食  
貧遺其後昆

高賓賜

吉水歸仙高氏系出南平王崇文諸孫之判吉州肇建一  
家族大蕃衍析居近里以灞橋顯于元先是有相地者下  
塋記云九代孫雙雙領薦至治庚申其諱鉞與從弟若鳳  
果聯舉于鄉灞橋高氏遂以經學名天下鉞字與誼號平  
陸若鳳字在翁號灞雪先外大父也先是以平陸共學書

後更易以易經登進士第而平陸獨擅書經學江西兩浙  
門人尤甚予少時傳家學以平陸文爲模範平陸諸孫予  
表兄也往還親密得以追想平陸之風流不但其文可師  
法也家兄又嘗爲言立本號自卑平陸之子與先祖尤相  
善先祖當元統甲戌獻尚書章旨時與講論而其敦厚隱  
德尤可稱道惜乎天下知平陸之文而不知有自卑爲之  
子也自卑之子子賓又與其父如一人是其必將有後也  
於是得子賓之子原舉而進之縣學朝夕過從家兄愛而  
誨之甚篤予又竊喜兄之有子也中間幾二十年家兄捐  
館舍予亦出處離合與原父子不得如往時朝夕相過從  
方以爲慨歡猶冀獲乞身朝廷歸與共尋舊學而孰知  
子賓亦棄我而死矣嗚呼惜哉原字建春亦兼學詩書有

聲場屋是建將繼灞雪而顯而亨積世之餘慶也歟於是  
建春以狀求予爲其父墓銘其可辭銘曰高君諱文其字  
子賓自少穎悟敬襲儒紳退菴夏君鄉邦哲人從師事之  
豈惟藝文詩言其志藹若春雪里有劉氏族本芳溪經文  
節義顯者一時有存敬翁淳直儀儀君處甥館親戚稱之  
翁耄而獨立嗣先卒亦有孤孫熒熒子子君盡事育老安  
少懷悱懣二氏古賢可偕隱居教授樂求心齋其號賓暘  
沒歲已丑生元盛時壽六十九子原與亨天者曰荆女適  
王氏壻曰隆高其二季處亦歸德門槎溪蕭氏鳳高顯文  
玄閔觀吉君之四孫君有家法古道是敦臨沒之言道誼  
諄諄祖坐檀山爲君之墳世有隱名徵以斯文褒封有兆  
賁此靈原

周君北濱

真真

君諱志仁字恒吉北濱其號也姓周氏世家吉水泥田始  
祖沂濱唐長慶中遷自廬陵之烏東世有隱德曾祖友成  
祖齊用父開甫益勤儉好施與曰吾無以遺子惟積善畀  
之他日庶其昌大乎君與伯兄東原壯遊燕薊諸公貴人  
爭欲致之館下君覩時事日異曰識時務爲俊傑且題奉  
吾親得免於禍幸矣題而盜果起宗人若水翁舉義兵保  
障君命猶子助之督耕墾脩歲凶已而果大歉廩有陳積  
施人貧乏莫不懷感事親至孝顛沛之際湯藥必親嘗喪  
祭必盡禮至 國朝嘗構一新百廢具舉兄弟四人東源  
南溪西岫相與怡怡如也一門之內長幼幾千指誘掖獎  
勸諄切戒諭無所不至嘗指從孫壽曰是必爲偉器後果

仕爲黔陽令嘗有名與宗老止水喬林橫溪東源隱山溪  
間往來倡和酒酣雅歌投壺掀然論辨慷慨英發尤好讀  
書手不釋卷篤於教子延禮居貞曹先生爲西塾師先生  
卒其子彥通繼之由是從學者多有所成家譜遇亂散軼  
未輯首倡族人脩述銀梓以傳所居前臨溪澗水潦病涉  
鬻篲爲梁人甚便之臨終猶戒子孫與之未訣嗚呼是可  
不謂故家之賢者歟君生延祐庚申七月二日沒以洪武  
壬戌十月二十四日墓在里之西符嶺初娶曾氏先卒子  
一人曰渙原其名珪篤慎好學睦姻族禮賢士人皆稱其  
孝友事繼母郭氏尤盡子道人皆頌君之有子也孫男二  
人瑜字季良琮字孝純孫女三人適仲岡李永紹羅子達  
曾孫鍾銓鐸君後十有三年而渙原卒又十六年季良命  
其族子黃岡學官公明述其狀來請銘於其墓碣銘曰  
脫危機致用裕如其志如其志倡勇爲積能施如其義如  
其義禮賢睦族能得師子孝孫良由父慈春雨霜露雲來  
思

劉君象賢

元季之亂大家世族能卓然不爲亂賊所污保其家復其  
盛昌其後者江鄉甚不多見也予嘗聞之夏璜劉君象賢  
謂兄弟首謀夜之吉安城報官軍掩取賊巢穴事泄官軍  
竟不至舉宗爲賊所屠亦皆不屈象賢獨脫身與妻子俱  
走免賊平迺歸鄉治生築居教子孫復其舊觀其艱難轉  
徙有人所不能堪者焉予謂聞賊首欲任用率其人相表  
裏爲輔車唇齒更遣致意甚厚使當時一聽許寧不免屠

害與艱難轉徙哉君矚然笑曰所以爲世家大族以其守禮義也予家在宋仕吉水縣簿宋亡與信國文公百戰守死以抗元帥終不爲屈至元雖乏顯仕然父祖以上感其恩澤亦自餘年豈可伍臬獍爲厲階耶義舉無成其榮多矣此先人之志也不然今日何顏復見家廟乎予深感其言歸以告大夫人大夫人曰外大父瀚雪高先生官平江在元盛時象賢其季壻也來平江未嘗逐游事聲色侈靡其家教訓嚴外大父每稱道之不置焉又聞之先君子云夏璜劉氏世本安福治尚書有名象賢大父諸父昆弟每過從談論其學問淵源非泛泛然比也由是常喜從象問昔時事象賢深愛厚與之言歷歷未嘗厭焉后子忝科第歸自翰林往拜謁之象賢爲之喜甚與飲酒日夜具道外

大父遺訓命其子汝哲與遊觀山水間指外大父所爲卜塋其祖墓而爲道其所以然見前人之游藝罔不造其妙而象賢平生坦夷豈弟愛人樂善敦尚詩禮其得於家庭親戚爲尤至也又往年予兄大經授徒夏璜象賢實爲之主汝哲親授業焉象賢朝夕所以與余兄講論多矣是予兄弟皆有所聞于君也君之喪也在洪武辛未三月九日子寓京師后子歸鄉君墓有宿草汝哲屢以銘爲請以事在不果爲又二十年于此始克爲銘君諱崇字德象象賢其號也族有譜予嘗爲之序曾祖時可至德父則賢母龐氏娶高氏再娶蕭氏子男三人汝霖汝哲汝完女二人長適東溪彭季良次適東門江彥政孫男逸隱寬洪迪魁同倫仲綬六齠君生大定丁卯四月十三得年六十五墓在

鄉東坑之原銘曰清曠坦夷不爲矯飾學問淳良家庭親戚平生之言可禪世教有銘可鐫有子能孝

### 徐學皋

宋亡元興吉水東門徐氏起家至萬石然本儒者延賢先生業應進士舉過其門絃誦之聲未嘗絕也雖富而不驕義而好禮由是部使者有旌門之舉而仕爲小官能有惠譽揭文安公以黃丞相擬之者平遠君也遇亂出軍需畫策與親戚舉義兵保障水西者城南君兄弟平遠諸孫也余不及識之見其與先公賡和詩有杜少陵之志而敬慕之也蓋世儲休慶而城南君之子學皋當國家隆平之會歸復故居衣冠典刑柱石其宗者餘四十年一時學者欲考見前代故家之風流皆從君質問焉而君能樂以告

人忠厚明辨聽者莫不欣然有所得也予自少時先公竒愛之託君議婚君即云吾季女賢可以爲歸且術者云公爲命婦遂許適予自始議婚至有外孫余一言生致位通顯待遇一以賓客之禮誠意敬重每送予別臨岐至江許舉酒寬慰祝頤深情繾綣依依然如知己朋友在遠道數千里數寄書問臨終猶屬其子孫致意予於戲子別去財歲餘歸而君音容不可覩矣豈不悲哉君諱泰字子開學皋其號也母蕭氏早沒君事繼母胡極其孝事兄極其謹兄卒撫猶子極其慈教子孫惟事詩書務謹飭處鄉閭人服其公正歲時宴集家延禮爲上賓連旬日夜達旦飲酒不亂遇其醉恂恂然一談一笑皆可聽聞君真可謂之淳厚君子歟其家世本金陵中書令臨淄王之諫裔孫余既



序其家譜茲不贅述君娶曾氏蘭溪大族采公節公三聘  
諸孫曾必暮之女有賢行其祖輝甫徙居吉水北門家亦  
致萬石君嘗寓其貳館珍寶無所私於此見君之夫嬾於  
財利輕重何如哉子三長亨字叔通次讓字叔遜季吉字  
叔迪女三長適積符未廷綱次適夏璜劉汝瞻孫男傳保  
承尹保衡儀保升偶保茂傑保庶侃保宜保儻仕保祿俱  
保興備保大君生至正庚辰八月四日未樂巳丑十月十  
七日卒年七十將以庚寅十二月庚申日葬于所居鑑湖  
之西阡諸子泣請予銘銘曰德內榮不譽名既固既安惟  
永寧

古田尹胡公

予讀元史至於危素建言擇將帥任守令撫流民務農保

境卧薪嘗膽以圖中興而順帝稍川其說京南之境幾無  
曠土其所辟舉皆能有功效驚曰是殆可以圖存而何至  
於覆亡耶蓋未幾而素出爲嶺北令丞而所舉者亦皆散  
去而元遂亡矣悲夫士不遇時雖或小試而終以泯沒無  
聞可不惜哉此予於古田縣尹胡公之事而重有感也公  
爲冀州路照磨素所薦也攝掌路事未幾大治公奏事闕  
下而危公遂出冀州復沒于寇時福尤爲元守廼去爲中  
書省照磨部歲貢入海赴都遇盜力戰却之得達朝廷賜  
勞甚厚特授福建路古田縣尹而事已不可爲矣寓閩中  
杜門獨處人以爲迂大明兵拘至京懇辭還鄉隱居七里  
莊三十餘年以壽終於乎此其才智使之得究其用於危  
亡豈不有所維持哉胡公既沒之十年其子直始以狀爲

求之銘於其墓碣於戲是豈可不銘也按狀公自警敏然恬淡不事矜飾嗜學無倦其叔父小山先生爲高安學官時年纔十三既從之官既歸而克然有所進矣其始從學春秋於予祖叔蒼霖先生繼從果齋夏先生之於經其不既深矣乎二十北游舉茂材異等授冀州棗強縣教諭需次還家余叔祖伯中先生建東山書院于鄉公從授易經居宿館下逾二年廼之棗強任弟子自遠至者數百人學舍不能容官深州衡水縣調掾山北廉訪司未行危公薦爲冀州冀州治棗強由其爲學官時信於人也此所以未幾而致大治歟公祖妣予曾祖姑也先大父太史公真我至正乙酉舉進士及第公適在侍親見當時科第之榮先祖悅達而諸公貴人之相慶喜也每見予輒爲言之蓋深

以爲最其真厚之意爲何如哉公爲人長身王立鬚眉如畫其聲如鐘鄉先生祠輦若申齊桂隱二劉公大司徒楚國歐陽文公起巖張公虞文靖公揭文安公皆極稱賞而知之最深矣危公也公素善書楷法適勁類其爲人晚及子山夔公之門嘗爲書其曾大父墓銘而詹公孟舉與先叔父恭先爲同門同入禁中寫書同以書名者也其方爲棗強學官也或言前官匿喪宜往趣其去公曰吾筮仕卽爲此耶且將待之其在福建省幕也有餽白金數百兩却之而不言平章聞以美公曰子何減於楊震公謝實無有其忠厚耻言人過多此類也平居教子弟諄諄以禮義爲勉以刻薄爲戒其弟時晦好種花歲時宴賞有簫鼓之娛公爲盡醉歌詩和之蓋不以拂其弟之意弟卒大慟幾絕

歲時慘傷焉喪祭一遵朱子禮屏絕異端高居夷簡讀書  
自娛居無脩飾僅蔽風雨凝塵不掃玉壺冰清湛如也其  
所得於大人先生者深矣末學小生焉能窺其際哉有子  
曰善字叔方直字敬方其季子也賢而有問學文章公之  
教養培植又古人之所難能也公父士巽號巽湖先大父  
視爲表弟而尤愛厚於先公公嘗曰叔父慷慨豪舉有古  
烈士之風茲其篤慶於公歟先娶蕭氏後娶楊氏叔方子  
曰肅恢敏敬方子曰槩未樂己丑進士次業繁祭公女三  
人長適帶源王奇孟次適城南藍宗勉次適東溪廖自勤  
今爲慶府紀善公生至大庚申七月十一歿以庚辰九月  
二日享年八十一墓在鄉陳方赤嶺從先祖也銘曰今有  
胡氏旌爲義門鼻祖植善世遺言言出其門者必皆

山立有官而不永年巽湖隱德萃于古田弱冠拔書徒步  
北燕起家學校其徒如雲歷仕有聲薦剡有陳遂保晉興  
撫其流民公去所部郡隨以淪逾河蹈海斷鰲補天崎嶇  
轉漕俾縣于邊公有先見杜門棄官隱處故山踰三十年  
從容進退庶幾其全明哲保身胡公有焉

曾孺人

孺人曾氏旣沒之世有五年其孫三顧始奉前昌樂知縣  
彥翬王先生所爲狀求予銘其墓拒作狀之歲月世有一  
年而先生沒亦十餘年矣乃按狀爲銘曾氏吉水蘭溪人  
宋侍郎弘廸家林塘生公藩宋黃州司戶叅軍生立祖立  
祖生茂遠其父也幼端謹父母鍾愛之年十六歸于銀溪  
謝氏雷州教授道翁之次子愈賢閨門雍睦事舅姑相夫

治產用致殷裕元季愈賢暨子主一克一舉義兵兵敗家  
毀父子死難孺人奮志節撫孤幼再造厥家延致大儒山  
泉解先生來泰劉先生善雲楊先生爲西塾師賓客之奉  
詩禮之敦崇視家之未毀殆有過焉嘗夜自課紡績勵諸  
子勤燈火唔啞之聲琅然人以孺人爲善教焉 國初諸  
子聯貢于鄉歷仕靄縣迎就致養思軒往來命服輝映煌  
煌如也人莫不稱其盛福焉生元皇慶癸丑浚以洪武丙  
寅子男七人女一人適王煥文其墓在苦行嶺之原銘曰  
狀稱孺人嘗夜紡績獲盜問其母老家貧賑之以穀戒家  
人勿言盜卒爲善於乎此王彥方之所難也而以一女子  
能之豈不與古之賢淑並稱美哉

清河丞徐君

辛卯

前年從父原復丞華容爲言國初侍兄原震爲令清河丞  
得鄱陽徐君伯而進賢吳君庸爲簿三人相得甚協恭圖  
治其民至今追思之遇夜共讀書爲詩歌文章飲酒相樂  
言不及毫髮私昵剛濟其柔則徐君沒已久吳公在嶺南  
而伯兄家居不相聞者久一念及之未嘗不爲之慨然太  
息也今吾又去爲丞將以徐君爲法不知今若簿有若吳  
君之與伯兄乎若有之華容之政將必有可觀而民將思  
之也去年叔父語時不能細徐君之行事今年君之子奉  
君之從弟考功郎中旭所狀行來請銘噫余所願爲也夫  
何敢辭按狀君諱恕伯權其字也幼穎敏六歲知務學受  
詩於絅齋先生一試鄉校輒魁元季寇陷樂平以鄉兵數  
千來會官軍復之主師第其功當受官辭不拜國初洪武

疾戍以明經薦于鄉明年得仕臨清縣丞水陸之會地劇而民貧方大亂之後中山徐武寧王宿重兵居守君周旋上下與之贊畫教民禮讓招撫流亡申雪冤滯至捐俸勸分以業窮困興學校期年化洽調清河視臨清爲有加踰二年以疾卒于京師於乎丞固難於令者也君子所遇之難又如此所致迺如此漢有循良吏豈足多哉惜乎未見其止也君生名家少從先生長者克其格物致知之學故雖天文地理醫藥武經衆技之說莫不傍通曲暢以輔翼仁義不流懦闊迂嘗從世父處謙行道中遇仇人結衆狙繫之君奮挺大呼其衆駭散有族人好酒如酗屢加以橫逆順受未嘗一反唇其孝慈睦族類如此其自少年時一呼殄寇復其鄉邑有功而不伐庶幾仁者之勇豈不深可

惜哉君嘗自謂抱膝山人晚號釣雪翁文章有奇氣凡着千卷藏于家生元泰定丙寅六月十九歿以洪武乙卯四月廿九娶氏子男二人同高高騰縣丞珠初仕爲學官今爲嘉興府照磨其先自五季世始家樂平高祖剛顯祖公達父處信母顧氏里之塔山君之墓也銘曰運于桶削梁棟其左小邑大吏天嗇其身裕其世

仲巽陳君

吉水俗尚儒學敬老尊賢豪傑之士喜賓客重然諾輕貨財親師取友畏敬奉承洞洞屬屬然少時所目睹仲巽陳君其一也予叔祖季通先生抱負奇節在元盛時雖吳文正公虞文靖公尚不屈意事之國初罷縣萬方辟之不肯起人無賢不肖望之屏息其氣象蓋如此歎主仲巽家

師席二十年無所忤拂間嘗稱其豪偉之士則仲異誠有  
過人者歟非有過人之量者不能也賓客愛其禮友朋稱  
其厚家益費而益饒襟懷洞然志氣軒豁慷慨赴義世不  
多有於戲豈不深可惜哉君生至正辛巳年終四十八卒  
洪武戊辰五月三日也娶城東戴氏同水王氏子男二安  
字叔寧鼎字國器女三長適城南胡子淵次適富田蕭永  
清幼適里中董源孫男麟字公姓端字公正綱章武模望  
皆幼君沒有四年辛未二月十九其子奉君柩與妻戴氏  
合塋于吉水之南遇異人指示其穴克符吉占君之父文  
彬尤忠厚相傳為義門之族銘曰陳氏之先有積德君襲  
餘慶秉義烈慷慨豪舉慕先哲親師取友淑後昆表著英  
發中和淳堅砥礪只馨云云

倪處士癸巳

處士倪公諱趙奴字世安其先刺史諱潭若水昆季也尚  
書右丞其曾孫唐兵部檢校尚書後封魏國公諱康民字  
時思由藁城徙歙子孫家新安之休陽至士毅先生以道  
鳴八世祖十公遷婺源還珠里高祖士剛曾祖震軒祖伯  
漢父宗猷世有隱德業儒毋江氏龍溪右族公生十三年  
應門幹蠶稍長以家事自任二親融融其樂兄弟怡怡如  
也親喪廬墓哀毀有聞事祖母汪氏盡孝汪年八十餘嘗  
對宗族宣言如崔夫人旨鄉鄰稱無間言務於睦族嚴於  
奉先重墓祭歲時必躬詣拜掃雞鳴而起致敬家廟對坐  
堂上訓諸子姓治僮僕授業任事肅於朝廷凡先世有  
為而廢弛者輒復興焉宗族鄉鄰有飢寒患難隨所得為

賑恤之恐後至於津梁道路亦隨力脩治鄉人有爭訟詣門求直必以理解渙然冰釋歲戊子疫所舉葬數十喪義望甚著邑大夫舉行鄉飲酒禮為上賓深衣大帶揖讓其間衆皆謂古君子復見於今日也其平居和厚端重然寡言笑遇賓客至款洽傾倒豁如也雅好讀書能屬文晚遂於地理之學毋初葬親安學成視之曰必有水泉迺果然遂改葬焉祖居地狹以歲丁卯營築居于五鎮之南市卜曰當有顯者至歲辛卯子以孚舉進士入大學其德不誣類此然皆不以自名也嘗手編族譜勉以孚亦善承其志家居愉如也永樂癸巳十二月二十九以疾卒其生時至正丁亥十二月十一日得年六十有七娶鄒氏先卒子三人長以孚次以達側室黃氏子以德孫男四人孝友孝敬

劉君惠遠

予方童穉家兄大經導予識劉君惠遠一見謂家兄曰令弟酷似其舅封州高使君聰明剛毅起兵討賊未三十取金紫如拾芥令弟酷似之可敬也且屬其子子齡曰如此人可與之游也由是時過從家兄與之相德登山臨水行吟賞酌促膝星夜平生履歷傾竭叙論兄之所以治亂群雄所以成敗天朝所以作興機深委備甚有條理蓋積

苦兵間勤勞三十年得一官辭不拜堅真不撓明炳幾先  
與適周旋家兄嘗謂予曰劉君惠遠豪傑人也力挽虎射  
命中未嘗自用善智出奇未嘗自能家庭百口外戚與焉  
同釜饑饉無間言嚴於教子篤於交友處於財裕如也  
儒術百家皆能通曉談說無所脫遺人有競皆心服其平  
兄之子容于外道遠弗克歸者逾十年徒步往資之以還  
尤喜濟人於急事寡姊甚有恩禮嘗在軍中主將欲殺一  
降人固爭得免後以事謫於 遇其人報謝不識也每臨  
患難無變其色辭衣裳必整飭起坐必莊敬音聲必洪暢  
辭肯直方人無少長賢不肖皆嚴憚之得年六十有三病  
且沒猶正坐不仆者久之于是沒餘十年矣予題自 京  
師子齡慘然謂予曰先人知君而令兄知先人最深願叩

其一三銘諸幽即先人不辱知君夫子不敢辭按其先本  
黃氏太史公族也 淵利繼芳繼思子劉氏父慶甫母彭  
氏娶何氏繼司子以弟之子子備嫡司子壽子齡也女三  
長適蕭鑿冲適高節李適謝三顧墓在里槎坪之原塋時  
執紼挽車以千計子備有男曰同祖曰愷悌曰歡子齡有  
男曰清曰慶曰平銘曰敢行義桓勇力明炳幾備卓識庶  
不利清不激材梗楠伍樗櫟種之深報不食世子孫無極

周君子用 丙申

子用出豐家自少卓然與寒士爭動若不事華侈從師講  
道冰蘗自勵寒士有志節者莫能有加也子用性穎敏甚  
六經諸史百氏靡不洞究治春秋折衆傳會微旨往往能  
通晝夜與共談諸史至元金接近年事如指諸掌通夕目



不交曠至明且然習以為常予未嘗去書冊此其穎敏甚  
而能勤苦所以為難也子用為文章精緻析理措辭不苟  
且一字論議似司馬子長蘇子瞻而純正頗似過之詩歌  
在漢魏陶常中鏗戾難辨然甚斬之不以示人平生知己  
惟黃君季岳劉君子素與予乃肯出其一二相讀與之而  
尤愛余三人者之文每為擊節其曰三君文必傳世余阨  
於命所恃者有兄子述即今翰林編脩崇述也果以文章  
鳴其子綺來求余銘刻於其墓其為人耿介絕俗做睨萬  
物之表有設施謀畫其族人火興於詩禮者子用也祖  
父以上皆名德環傑余獲拜其尊君靜隱不覺為之動容  
興起也其先烏東周氏余既叙其譜茲不復贅  
元至正辛丑二月十一終洪武乙亥十二月十一其墓在

新市之西澁水樂丙申十二月甲申日改葬石羊磯之原  
其山寅甲向娶銀溪謝氏子男二人曰綺曰其孫男五人  
容寧宥宜密銘曰其智圓其行方其學博文艷光乎尹山  
耀賢所藏

畊樂徐君

洪武戊午火學士徐均仕為肇慶府陽春縣主簿陽春故  
春州也瘴癘名品聞者惴慄每使者當按行託故避去由  
是縣豪得雄據為姦利縣官至受頤指少忤觸之輒死前  
後莫敢忤受頤指幸蒲考翻載去均庶知之至縣吏白應  
往視莫大老叱曰何物大老復白此洞主老病家居宜就  
見叱曰若化外抑民伍也亟走來見不然且屠戮出雙劍  
示之大老聞恐懼乘板輿至叱使下拜不得已蒲伏熟視

諭遣之即何其語有異而府符下問之遂繫之獄均曰是  
其人必且來劫獄戒吏士操鼓角柵其私衙自帶劍挾弓  
矢披甲長嘯大老二子果各將其衆來聞之皆愕莫敢前  
詰朝弄兩大瓜安石榴十數枝致饋皆黃金大珠也均不  
一視即麾出械繫大老身送之府中後府官竟受賂大老  
賊脫歸數至前所饋均丁再拒之發怒欲捕治大老震慄  
求府符調均攝陽江縣陽江亦治服而均丁毋憂去此史  
氏之文也徐吉州大族南塘中書侍郎上饒罷公遜之後  
曾祖林隱先生先公外大父也祖本仁父仕麒母姜氏其  
遇元季之亂年財十三先公時在大學先祖死節仕麒挈  
予兩家避難崎嶇二十年經紀挾持克復安業皆其父子  
余是以知之尤悉子畊其字畊樂號也其少時聰敏十七

六歲僑居授徒志行卓然從師勤窓王先生治尚書離亂  
中成學霸勝事何以過哉 國初爲縣學生卒業公之  
門洪武乙卯貢大學試中書御史臺入高等分教山西夏  
縣後官會同謝事家居以壽終其事親事師誠懇至古賢  
人不能過也其享年五十九配王氏子男壽廣成今爲工  
部主事光廣明少游邑庠女適姜 胡 蕭 其墓在吉  
水查坑之原銘曰士行全勩銘堅千萬年庶潔徐君之古  
墳

中議大夫吉安路總管劉明道神道碑

元季亂興斬沔江右最先被兵列郡先解旣陷而能復者  
惟吉慶群寇之衝與之戰終不爲屈 國朝兵至率先  
圖效股陳友諒者亦惟吉安吉安忠義之士固多有之若

起齊民興義兵保其全節子孫庇賴之鄉人追思之題其墓曰元中議大夫吉安路總管劉公神道碑惟於明道見之明道常客遊元都時方溺於承乎人情偷隋權倖縱橫即私謁所親曰觀天時人事不久亂將作矣所親亦竊恠其言然謂劉公多卓識不言言之公更以語先君子君子子憮然曰吾意政爾爲之柰何子先歸明道即促裝南還於是明道以大臣薦爲袁州分宜縣尹以母老辭不赴壬辰之秋鄉人親戚多勸繫衣避匿即奮曰大夫夫死即爲忠義鬼豈能嚮草間求活請勿開口吾慮之久矣傾貲發粟召募壯勇一日數千人造戰艦連營江上招撫流亡人情悅附未幾下流群寇數萬議曰劉某結營江上郡城之鐵壁也鐵壁一摧上流可長驅而取也迺并力來攻百計

禦之群寇敗走月餘後至連營築堡誓將必克連三大破却之郡城以安監司郡守奏爲吉水州判官繼以功陞同知復陞知州宣命下俄陞吉安路治中兼義兵萬戶時江西行中書省距吉安上下五百餘里內多寇兵劫掠乃遣從弟成治兵江西防遏上下五百餘里肅然歲薦饑所活甚衆參政全普庵薩里都事吳伯都刺皆總兵分省于吉漫不事事惟公是倚孤軍血戰屢建奇功事問于朝朝廷遣使慰勞擢爲中議大夫吉安路總管兼管內勸農防禦事拜命于家人共榮之僞漢主陳友諒遣其大將熊天瑞盛兵來攻與之力戰幾獲天瑞吳伯都刺遣其將搭普來援反降之爲先導公軍稍却天瑞即長驅上流全普庵撒里吳伯都刺宵遁衆大潰公收殘兵保壘以俟而元兵終

不至天兵南來公竟不屈卧病卒于京時乙巳六月十一日也公生元大德甲辰其諱照更名永武其先吉之安福人曾祖宗政宋孝州司戶祖天驥元進義副尉會川路同知知會通判事父仁壽元從事郎歸仁州判母李氏娶王氏江州路總管璋父之女子與簡通溥環勝孫士瞻澄彥濟士彞士林彥鴻曾孫李安中興季隆子先君子後歸與公共事而予之猶子禎期其曾孫壻也通溥屬之與簡之外孫龐振舒求刻辭于神道之碑公墓在淳塘之原原其辭曰似漢諸侯世業儒歷千百歲膏澤腴桓桓吉州少也孤力學行義忠孝俱手捧日月天一隅志通金石死不渝慶流後昆善譽孳孳高墳世楷模

尚書郁公神道碑銘

國朝復先王之典禮所以付任才能用長舊典裁成輔相以全天下之士保其初終恩兼新故大小之臣咸稱職業班班有可稱道者豈惟天祐國家而賜之以多賢亦國家深仁厚澤有以積累克稱天心也嗚呼豈不盛哉乃洪武戊辰歲予以年少擢進士爲中書舍人直翰林日侍講華蓋殿中時時引選官居前講官不避即顧問可否輒以直對一日見鳳陽郁公於儕衆中資貌環偉音吐濃暢威儀整齊知心異之上果賜名新即命戶部度支主事度支掌內幣賜予內直所與文淵閣相迓也會嘗與之議論練達經歷久相善也未幾公陞北平部郎中先是戶部其屬有四歲分爲十二故有是命進階奉議大夫二十四年超授嘉議大夫戶部右侍郎每奏事廷中王音顧問天

下地理陰陽戶口漕運之數民間利害無巨細皆嚮應無所遺謬在廷之臣莫不以難而謙然每事咨度其屬法者未嘗以精敏自多名位自高人又莫不以爲難及考滿遂陞尚書益寬大得體不爲鎖屑投資善大夫喪毋歸塋鳳陽賓客至者數郡盖公平生慷慨急於義饒財而好施尊禮儒生雅志喜交游不爲冷熱變親戚有急患難不避治家有法綜理微密而不傷於繁雖國家能曲成人才如公之才亦可謂難能者也今永樂三年八月五日公卒于官上賜棺斂祭之爲素服輟朝一日士大夫咸以爲榮公本蘇州吳縣人曾祖和祖仲喻父德字銘本母某氏祖父以洪武初遷鳳陽公隨而家焉公娶嚴氏尤善理家公於家事不以爲言而井然有條理無不舉公生至正丙戌正月十四年六十子彬字孟文將奉公之柩歸塋鳳陽臨淮公嘗托予銘墓而神道之碑亦不可無刻乃序而係之詩曰泰運肇開賢彙生巨細咸植勲業成有奮布衣位六卿寬裕強敏豈惟承有善不伐貴不盈人道不惡天所矜有崇斯阡其永寧

知思明府黃公神道碑

大明朝列大夫知廣西思明府黃公墓在鄉之莫萌嶺翰林學士國史總裁廬陵解薦縉紳刻其墓道之碑曰黃氏系緒陸終之封於黃今湖廣黃州故國也春秋時與會盟尊周室後併於楚子孫益顯且蕃思明著族宋仁宗時狄武襄奏補成忠郎克路分官鎮遏境吐遂以得民怨思明周南岸之離山相傳卜吉連世有官至訓武君躬長游元

都累官奉政大夫同漢陽路次襲知思明州元世祖命鎮南王脫驩討交趾爲嚮導供給從王入朝世祖說之手撫其背親酌賜之衣服金帛授勛虎符龍虎上將軍廣西兩江道都元帥仍思明路軍民總管取南寧宣化莫氏大姓用元是爲公之高祖至武毅將軍兼南寧路總管諱克順是爲公之曾祖其諱萬山公之祖父娶于萬承許氏六子皆賢武畧將軍思明路總管賜金虎符諱武勝公之伯也繼爲總管陞擢廣西兩江道宣慰使司都元帥諱武宗公之父也公母夫人龍州趙氏杞梓盛宗世儲休慶公諱忽都字曰朝顯弱冠而孤時方大亂鄰寇陸梁鎮之以靜撫民治兵以俟天命後三年爲洪武戊申 國朝兵下廣東轉指南寧即遣送印章受約束以歸民皆安堵不知有兵

明年己酉詔以思明路爲府賜誥命印章仍憚之戒莫敢犯暇則與其屬人弋游娛樂講習禦武其屬人皆親附之境內晏然安堵公真可謂豪傑人也后十八年爲洪武丙寅十萬山象出害民稼穡詔兩通侯率兵二萬餘驅而捕之建立馴象衛思明府率其民助治城塹嚮道山險峻除獸害未幾得白象以獻

太祖賜賚之甚厚因言地瘴僻遠不足立衛又明年有 詔遷衛橫州明年己巳三月二十公以疾卒生至正丁亥五月三十享年四十有三夫人趙氏先卒子廣平年十二繼室以元海北道元帥知上思州英傑之女生子廣成甫七歲英氏扶持其家後三年廣平襲爲知府卒年方十六又六年廣成入朝嗣爲知府比歲從征不遑啓慶公先塋在

鄉那壠卜云匪吉壙有水泉度成咨詢謀度夢寐慘傷以  
末樂元年癸未十月八日始得于吉所仍舉趙氏合塋果  
去水泉僉于高爽而墓道之碑未有刻辭流涕而跪曰余  
家守此將三百年而當兩世革命之際前有訓武公後有  
朝列公實寵綬之不有彰微其何以示子孫俾思明之人  
有所考見哉斯言亦信可書而刻之廣成子靜學有子曰  
玆今爲丘温衛指揮璘璠璿琬琤其辭曰

思明黃氏世閔閱宗歷再紀疆里截元室肇基光烈烈  
錫以虎符兼王節歸朝稽首刃不血黎民安堵笑啞

啞耕鑿豈知蒙帝力家慶綿綿由善積與國咸休

子孫食我銘斯文勒其石億萬斯年哭東壁

重脩福田明覺寺生佛道場碑

雩都漢縣也淮嬰城在烏山明川秀地旺物繁德人善教  
藏席其間如是我聞福田明覺寺去城百餘步遠於江省  
倍之環山洩疇勝右於邑蓋福田寺之總名統其間者十  
而明覺爲稱首近額也在寺之東偏本始自梁天監至唐  
末五季有僧姓具諱文祐家于信豐失其師傳侶影方游  
聞巔之岬山秀異杖錫扳躋蛇馴虎伏樹剝而居久而去  
之遂止于雩是時明覺曰僧伽院文祐王焉人稱爲具僧  
伽佯狂市肆葷酒無嫌嘗持松稍行歌曰趙家天子乃宋  
興之後人莫測知皆笑以爲狂市肆無萌驚殘及腹兵戈  
無釁悲血流毒嫉惡如穢聞善則詔由是或爲凶人駟逐  
一日竄其園竹間大呼竹將爲帚未幾林竹枯死主家亦  
替人始驚異院之陰有林竹其一竿特鉅僧伽嘗午夜拷


歌寺衆疾而斲之不生芝焉邑人曾德泰垂老無嗣萌意  
飯之且而已歎其門言當有子已而果然有孫德俊者之  
汀州武平謁定應禪師師曰雱陽有佛僧伽吾法弟也寄  
之一扇舟還艤岸僧伽迎問而徑取之由是昔之笑侮者  
皈依詈逐者媿悔而皆號爲生佛矣觀其明炳幾先預知  
逆數悲歌浪語無不霧徵可謂神也已至祥符己酉六月  
遍辭交友無疾而化邑人不忍火之塑而祠焉至于今不  
壞化之日邑人丘繼茲遇于蜀之河梁問言疾應徇僕風  
趨追之不及繼而數有見焉化身髮鬢嘗生義姊氏賢  
錫工謝某月來淨之二人皆年老久而默禱頭髮無生塑  
像忽若悲別者鬢由是斬不髮出二人者歸無疾而化邑  
之人土水旱疾疫凡盜兵不測之災祈感響會常有狂賊

縱火方然望寺而滅又時毀寺恍惚遇佛投內而捨凡此  
功德利潤嗚人不可殫紀傳之父老刻之金石其可信也  
已可謂靈也開禧勅封靈濟大帥加熙加封慈祐咸淳加  
封慧應至於六字可謂顯也嗟夫僧伽遠矣有作於前有  
承於後不其大可喜歟自元盛時于祖師榮昌三傳爲都  
綱廣御徹今了明師法號秋月姓陳邑之著姓洪武壬戌  
天子命爲僧會以金剛智慧積山海功因有維新撤舊之功  
於是火自御言閣延燒而生佛巋然獨存蓋地壞宜易維  
天維佛所以啓明師成此勝事也蓋曰不有廢者其何以  
興非歟善哉於是捐貲不吝叩善咸施殿堂門寢樓觀廩  
福一新其故夥哆其其矣維是一二同志若監院祖燈法  
號無照姓謝雱之城南人也岐嶷絕於童如髻鬢不爲童



游夙好脩行與師麗行厥况謝成尤能樂施種種無倦有  
力萬壽院僧紹禮法號南溟范吉水名宗工詩善贊經營  
相度共樹其教其果難能也已初寺有林竹巨竿伐後已  
枯死又云生佛化後有竹生其床下行而益茂中絕者久  
之今鬱然滿山皆非偶然是可書也舊田寺三門有唐咸  
通三年記李少鴻書宋嘉祐元豐有王鳴記各一通開禧  
勅封一道石刻具存秋月盡能護持之是皆可書余初來  
贛見有坊曰生佛恠而問之少長爭言昔吳生佛化來此  
出門不見固已異及來零陽予友彭君子信偕邑人士孫  
君思遠倪君直籍籍言其故且曰了明之善承也予質之  
老成郭公銘善曰其信然質之廣文黃輔君佑示其所記  
僉辭允是用立碑以照無極

詞曰 西方有佛言湮迹遠中州生佛諸佛之選此  
山竒嶮棄而弗閱雪多善人可以誘說倚嗟福田寺將  
千年有緣明覺佛來處焉放浪佯狂變化無方或亡或  
存或穢或蕪久而益著信及憐庶滅而長存以福其寓  
當其在世慈愍利物捍患禦災有未無歇每歲六月不  
以蒸熟填門軋衛白首髦結來拜祇祈佛毋我違佛有  
憑處了明之爲祇園布金剎檀作林雪多君子幸聽予  
箴禍福無門吉凶相尋常如敬佛即佛是心



解學士文集九卷終

解學士文集

卷之九



